

## **ASO GAFUA, 31 IANUARI 2022**

*Na toe faaauau Taulumaga a le Fono Aoao Faitulafono i le itula e 5:55 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2021/2022.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoao Faitulafono.

E momoli atu le faafetai ma le faamalo i le paia o le Palemene i lo outou onosai ma le lavapapale mo le faaauauina o le tatou galuega i lenei afiafi.

E faataatiaese Taulumaga i le itula e 1:00 i le aoauli analeila o lo o saunoa le afioga i le Taitaifono o le Komiti o Tupe Maua ma Tupe Totogi ia po o le sui usufono mo Gagaifomauga Nu.2. Ou te tapa ma le faaloalo lau Afioga i le sui usufono mamalu e tulai mai e faaauau lau saunoaga.

**Afioga VAELE PAIAAUA IONA PAIAAUA SEKUINI (Taitaifono Komiti o Tupe Maua ma Tupe Totogi):** Faafetai i lau afioga i le Fofoga Fetalai ua toe maua se avanoa o lenei usugafono e faaauau ai se manatu. Ia o se faamatalaga foi a le Komiti e tusa ma lana lipoti.

Faafetai i aao laveai o le Atua ua mafai ai ona toe laveaiina le soifua ma le ola o le Palemene ia a o feagai ai ma nai itula ma nisi o fuafuaga ua toe taitai mai ai i le manuia maua ai lenei feiloaiga. Viia ai le Atua.

Lau afioga i le Fofoga Fetalai e malolo le tatou galuega i le taimi ua sola ua oo mai se faamatalaga i le tulaga i le tau faamanoina o galuega e fitoitonu ma lenei Komiti Faa-Palemene. O le galuega a le Komiti lenei lau afioga i le Fofoga Fetalai o le mataituina o le toe fetuutuunaiga o vaegatupe ua faasaina. Ua toe fetuunai e le Matagaluega mo nisi o galuega o lo o fia faatino. E matua manaomia foi e le Komiti lenei le manino o faiga faavae ma taiala manuia, e faamatuuina ai so o se vaegatupe mo galuega faatino a le Malo ma le tele ma le anoanoai o isi galuega.

O lona uiga e tele le sao o le Komiti lenei e galulue faatasi ai ma le Faigamalo aemaise lava le afioga i le Minisita o Tupe ma lana Matagaluega ina ia atagia ai pea tulaga o pulega a le Malo lelei.

Lau Afioga i le Fofoga Fetalai e le faagaloina foi le agaga faafetai e momoli i le afioga i le Minisita o Tupe ma lana Matagaluega i le latou faasoa utiuti. Malo le lufilufi limalelei, malo le mataala, malo le finau, faafetai i lo outou lagolago malosi i le faigamalo. E momoli atu foi le faafetai tele i Ofisa Sili o Pulega o Matagaluega o Faalapotopotoga Tumaoti a le Malo, e faapea foi Pulega ma le lavalao o Matagaluega, o e sa autovaa mai aua le iloiloina o vaegatupe faaopoopo ma vaegatupe fetuunai mo galuega i lenei Tala Faaopoopo Nu.1 o le Tupe.

E momoli atu le matou faafetai tele i a outou tapenaga uma, sa tau fuafuaina ai le faatatauina o nei vaegatupe, e faaauuina ai lenei 6 masina o totoe o le Tausaga Faaletupe. O le mea lea e momoli atu ai le faamalo ma le faafetai. Faafetai le lavapapale a o fesiligia a outou afioga e sui usufono mamalu o lenei Komiti. O le upu moni na vave ona manino le Komiti lenei ona o le manino foi o la outou pitolaau. O le faamalamalamaina o vaegatupe taitasi ua faatatauina ai vaegatupe e pei ona taua, i le Tala Faatatau Faaopoopo o le Tupe.

Ae e i ai le tuualalo a le Komiti lenei, e i ai le talitonuga o le Taitaifono ma le Komiti o nei e fausia ai taeao. E aoga foi mea e tutupu, e toe fotuai ai le malama o le aso fou. E le o se faatonuga ae ua na o se tuualalo a le Komiti, e matua manaomia lava ia lo tatou galulue faatasi e mama ai la tatou galuega.

Ae i le faatinoga o le galuega a le Komiti lenei mo le silafia e le mamalu o le Maota, e le o faia tau autago pe taumatemate. O lo o manino lava le Komiti i Tulafono ma taiala e faatino ai ana galuega e pei ona aiaia i lalo o le Tulafono Tumau e 172 tiute tauave o le Komiti lenei.

O le mea lea le paia e o Ofisa Sili o Pulega o Matagaluega ma Faalapotopotoga Tumaoti a lo tatou Malo, o le tatalo a le pumate, ia outou alofagia le afiio atu ma le talitali a taitai o le atunuu, ua tofofi i Komiti Faa-Palemene, e matou te matua faaaloaloga lo outou valaauina aua o outou lava e faalagolago i ai le faigamalo ma Komiti Faa-Palemene. Ae o le tatalo ia maua pea lo outou malosi mai i le Atua ma saga faamanuia le Atua i feau ma tiute.

O le agaga maualuga o le Komiti lenei, ia manino Samoa i le tatou faasoa ma le faaoga tatauina o tupe a le atunuu. Ia o tatou galulue ma le faamaoni ma tausisi pea i le tatou amiotonu, aua o lo o mataitu o tatou faiva e le mataisau. A mapo ma maopo lo tatou lotoifale, ua sologa lelei faiva o le Malo. Ae sili ona manuia ai le tapuaiga a Samoa lea o lo o tapuaia o tatou faiva.

Lau afioga i le Fofoga Fetalai, e momoli atu foi le faafetai tele i sui usufono mamalu uma sa sausaunoa i le Tala Faatatau Faaopoopo Nu.1. o le Tupe lenei. O se taimi ona outou faafogafoga lea i le vaaimamao ma le vaailalata a le Komiti e ala i ana saililiga ma ana fautuaga i le Malo. Ae mo le silafia e lenei Maota ma le faafogafoga tapuai mai a Samoa, e na o le 8 lava ia Matagaluega a le Malo o lo o aafia i le Tala Faatatau Faaopoopo Nu.1 lenei.

Ae ui ina toaitiiti ia Matagaluega o lo o aafia i lenei Tala Faatatau Faaopoopo, ae molimauina e le Komiti, e maeu le alofa ma le agalelei o le Atua. E ala i le galuega lilo a lona agaga o lo o faaosofia ai pea le aao mafola a o tatou paaga i fafo, o lo o fesoasoani tele i lenei Tala Faaopoopo o le Tupe. Ae e pei ona silafia sa sausaunoa le mamalu o nisi o sui usufono o lenei Palemene, o lenei Tala o le Tupe ua faaigoaina e nisi o le Small Money.

Ae lau afioga i le Fofoga Fetalai e le faapena le vaai a le Komiti lenei, aua o le miliona, e le o se tupe laitiiti. O le agaga o le Komiti lenei, a faasoasoa lelei lea tauutiuti, e fanau mai ai ia le taumasuasua o tatou ipu, e manuia foi mea uma tatou te faia.

Lau afioga i le Fofoga Fetalai, ona ou oo mai lea i le tolaulauina o le Tala o le Tupe o le lipoti a le Komiti lenei. Ua taoto i le laulauafono le Tala Faaopoopo po o le lipoti a le Komiti lenei, ae silasila ane e lelei ona amata mai i le Vaega lona 5, o le vaauga aooatetele i le Tala Faatatau Faaopoopo Nu.1. 2021/2022. O lo o taulai pea le silasila a le Malo e ala i lenei Tala Faatatau Faaopoopo Nu.1. 2021/2022 i auala talafeagai e tali atu ai i aafiaga o le faamai o le Koviti-19 e pei ona aafia ai si o tatou atunuu. O lea o lo o afaina ai le tamaoiga o Samoa, ae faapea foi ia le lalolagi atoa.

O le naunautaiga o le Malo ia faaauau pea ana atinae masani aemaise o fuafuaga alualumamao ina ia faatumauina pea le sologa lelei o lona tamaoiga mo le 6 masina o lo o totoe o le Tausaga Faaletupe 2021/2022.

### **5.1 Aotelega o tupe maua ma tupe alu faaopoopo faatatauina.**

Tupe maua ma tupe faameaalofa.	\$19,472,807
Tupe alu mo polokalame	\$5, 678, 612
Tupe alu faatupe i Tupe Faameaalofa	\$9,902,513
Tupe alu faaletulafono	\$1,601,587
<b>AOFAIGA</b>	<b>\$17,182,712</b>
<b>Tupe faasili</b>	<b>\$2,290,095</b>

### **5.2 Oototoga o Tupe Maua ma Tupe Alu Faaopoopo Faatatauina.**

#### **5.2.1 Tupe Maua Masani ma Tupe Faameaalofa.**

<b>Poloketi mo:</b>	
Polokalame mo le Taofia o Sauaga i totonu o aiga	\$50,770
Malu Puipuia o Ituaiga Niu Eseeese o le Pasefika	\$26,099

Puipua ma le Toe Totoina o Niu i totonu o le Pasefika	\$46,523
Siitia o Tupe Faafaigaluegaina Atinaeina o le Niu	\$18,438
Suesuega i luga o le faafaigaluegaina o fanau laiti	\$101,541
Tuufaatasia o le Lipoti Iona 4 i luga o le malu	
Puipua o nisi o Punaoa Faanatura o le Atunuu	\$88,848
Fesoasoani e tali atu ai i aafiaga o le Faamai o le Koviti-19	\$19,140,588
<b>AOFAIGA</b>	<b>\$19,472,807</b>

### 5.2.2 Tupe Alu Faaopoopo mo Polokalame

**E \$10.3 miliona tupe alu faaopoopo ua faatupeina i lalo o le Tala Faatatau Faaopoopo Muamua o Tupe 2021/2022 ua auiliili atu i lalo:**

Matagaluega o Faatoaga ma Faigafaiva	\$320,000
Matagaluega o Pisinisi Alamanuia ma Leipa	\$20,000
Matagaluega o Tupe	\$4,339,713
Matagaluega o Mataupu tau i le Va i Fafu ma Fefaatauaiga	\$516,129
Matagaluega o Punaoa Faalenatura ma le Siosiomaga	\$493,719
Matagaluega o Leoleo ma Falepuipui	\$480,410
Matagaluega o Galuega, Felauaiga ma Atinae Eseeese	\$4,100,000
Ofisa o le Fono Aoaofaitulafono	\$80,000
<b>AOFAIGA</b>	<b>\$10,349,971</b>

### 5.2.3 Faaitiitiga o Tupe Alu i Polokalame.

**E \$4.6 miliona tupe toe fetuunai ua faaitiitia ai Tupe Faaalu mai Polokalame o lo o aofia i le Tala Faatatau Faaopoopo Nu.1 o Tupe 2021/2022.**

Matagaluega o Faatoaga ma Faigafaiva	(\$320,000)
Matagaluega o Tupe	(\$4,200,000)
Matagaluega o Punaoa Faalenatura ma le Siosiomaga	(\$71,359)
Ofisa o le Fono Aoaofaitulafono	(\$80,000)
<b>AOFAIGA</b>	<b>(\$4,671,359)</b>

### 5.2.4 Tupe Alu Faatupe mai Meaalofa

Polokalame mo le Taofia o Sauaga i totonu o aiga	\$50,770
Malu Puipua o Ituaiga Niu Eseeese o le Pasefika	\$26,099
Puipua ma le Toe Totoina o Niu i totonu o le Pasefika	\$46,523
Siitia o Tupe Faafaigaluegaina Atinaeina o le Niu	\$18,438
Suesuega i luga o le faafaigaluegaina o fanau laiti	\$101,541

Tuufaatasia o le Lipoti lona 4 i luga o le malu Puipuia o nisi o Punaoa Faanatura o le Atunuu Fesoasoani e tali atu ai i aafiaga o le Faamai o le Koviti-19	\$88,848 \$9,570,294
<b>Aofaiga</b>	<b>\$9,902,513</b>

### 5.2.5 Tupe alu Faaletulafono

Tulafono o Faasologa o Totogi 1964	\$1,601,587
<b>Tupe Faasili</b>	<b>\$2,290,095</b>

Lau afioga i le Fofoga Fetalai o le vaega lona 6;

## 6. OTOOTOGA O SAILIILIGA MA FAUTUAGA.

### 6.1 MATAGALUEGA O FAATOAGA MA FAIGAFAIVA.

<b>Tupe Alu Faaopoopo Faatatauina 2021/2022</b>	<b>\$320,000</b>
<b>Faaititia o Tupe Alu Faatatauina 2021/2022</b>	<b>(\$320,00)</b>

E \$320,000 vaegatupe alu faaopoopo ua faatatauina i le 2021/2022 mo le Matagaluega o Faatoaga ma Faigafaiva ua auiliili atu i lalo:

i. Poloketi mo le Atinae o Faatoaga laiti	\$120,000
ii. Toe faaleleia o le Fale Teu Oloa i Savaii	\$200,000

Na faatauaina tele e le Komiti le fuafuaga a le Matagaluega mo le fausiaina o le fale gaosi manu o le feed meal lea e faatatauina iai le tupe alu faaopoopo e \$120,000. O le taua o lenei poloketi e fesoasoani ai i le atinaeina o lafumanu i totonu o le atunuu.

Na maua foi i faatalatalanoaga le faatinoina e ni tagata ua i ai le tomai faapitoa mai Saina o lenei atinae i totonu o Samoa, ma o se avanoa taua foi e silasila iai le Matagaluega e faia iai ni a latou sailiiliga ma suesuega mo le agai i luma o le atinae tau lafumanu. E talitonu foi le Komiti o lenei matafaioi taua, o le a mafai ai lava e Samoa ona atinae ana ia lava meaai gaosi mo lafumanu, e aunoa ma le toe aapa atu i fesoasoani mai atunuu i fafo ma siitia ai pea tupe faaalua a le Malo mo nei fesoasoani (self sufficient).

**Tofa Hon Laufo Fonotoe Nuafesili Pierre Laufo (Anoamaa 2):** Lau afioga i le Fofoga Fetalai e tulai atu ma le faaaloalo se i fai sina malologa puupuu a le afioga i le Taitaifono.

**FOFOGA FETALAI:** Ia se i tulai mai lau afioga i le Sui Taitai o le Itu Agai...

**Tofa Hon Laufo Fonotoe Nuafesili Pierre Laufo:** O lea e matau atu o lea ua agai e tolaulau le lipoti atoa. Ia ae ou te talitonu lea sa lava le taimi atoa lenei e faitau ai ia afioga i sui usufono mamalu i le tatou lipoti o lea ua manino ma malamalama.

Ia ae o le fesoasoani atu i le sui usufono mamalu i le tulaga lea, ona atonu e i ai nisi mataupu taua o fia agai i ai saunoaga. Ia aua o lea ua agai i mea taitasi ia, ia ae o lea e tatou te le i oo foi i le taimi e auiliili ai ia mea taitasi.

Ia ne i tutulai atu sui usufono ma fesiligia ia le Taitaifono i mea uma nei, ia ae o lea foi e le i tali le Malo, i afioga i Minisita. Ia e pei o le soso atu lea ma le faaaloalo, po o le a le tulaga o le faagasologa o le tatou mataupu ma le faaaloalo.

**FOFOGA FETALAI:** Ia faafetai atu mo le saunoaga a lau afioga i le Sui Taitai o le Itu Agai, ia e taua foi le fautuaga. Ia ona o le manatu foi o le Taitaifono ina ia manino atoa ia le tatou Maota, ia o le mafuaaga foi lea e taumafai atu ai i se auala ina ia faafaigofie ma manino atoatoa ae taua foi le fautuaga lau afioga i le Taitaifono.

Ia atonu lava o lo o i ai lava le taua foi lea aano atoa o le tou lipoti ae o lea ua manino atoa lau folasaga. Ia o se fesoasoani foi lena mai le Sui Taitai o le Itu Agai ma le faaaloalo. Faaauau mai le saunoaga

**Afioga VAELE PAIAAUA IONA PAIAAUA SEKUINI:** Faafetai i lau afioga i le Fofoga Fetalai. Faafetai foi i le afioga i le Sui Taitai i le fesoasoani mai.

O le fia faatepa pea lau afioga i le Fofoga Fetalai i le agaga o le Komiti lenei. O le agaga o le Komiti lenei, ia le gata le manino i totonu o le Maota lenei. O la e faafogafoga tapuai mai ia le tatou atunuu. A manino foi le silasila o le tatou Maota, ia faapena foi ona oo atu le manino lena i le faafogafoga tapuai mai o le tatou atunuu. O le agaga lea, ae ou te lagona e leai se mea e faapopoleina ai ia le afioga i le Sui Taitai, ia o lea lava e lava le malosi e faatino ai le galuega, ae faafetai ou te manatu, o le agaga lena o le Komiti lau afioga i le Fofoga Fetalai.

E \$200,000 le vaegatupe faaopoopo ua faatatauina mo le toe faaleleia o le Fale Teu Oloa a le Matagaluega i Salelologa. O le faamoemoe o le Matagaluega ina ia avea pea lea nofoaga e tapena ma teu malu ai fua o faaeleeleaga a le aufaifaatoaga i Salafai e auina atu i fafo.

Na taua e le Komiti nisi o aafiaga o lo o o faaleagaina ai le atinaeina o faatoaga talo i nisi o vaega o le atunuu ma ua teva ai le agaga galue ona o ia faaletonu e pei o meatuaolo taaloa faapea ma talo mai feusuaiga ua liu. E talitonu le Komiti o se tulaga e ao ona silasila totoa i ai le Matagaluega ina

ia mautinoa le sologa lelei o ana galuega faatino ma ausia ana fuafuaga alualu mamao ma fesoasoani ai i le atunuu i le faatupulaia pea o lea atinae taua.

E (\$320,000) le faaitiitiga o tupe alu a le Matagaluega ina ua le faataunuuina le faatinoga o le Faaaliga o Faatoaga o le tausaga faaletupe 2021/2022. Peitai ua fuafua le Matagaluega mo le faaaogaina o lea vaegatupe faasao e toe uunaia ai le talomua i nuu ma afioaga taitasi. Na fautuaina ai foi e le Komiti, o lenei polokalame e tatau ona faalaugatasia uma ai afioaga ma alalafaga.

**Fautuaga:**

I le maea ai o saililiga a le Komiti i vaegatupe alu faaopoopo faatatauina i le Tala Faatatau Faaopoopo Nu.1 o Tupe 2021/2022 mo le Matagaluega o Faatoaga ma Faigafaiva, e fautuaina ai le Fono Aoaofaitulafono:

1. Ina ia faamaonia le \$320,000 o vaegatupe alu faaopoopo faatatauina mo le Matagaluega o Faatoaga ma Faigafaiva.
2. Ina ia faamaonia le (\$320,000) o le faaitiitiga o vaegatupe alu faatatauina a le Matagaluega o Faatoaga ma Faigafaiva.

**6.2 MATAGALUEGA O PISINISI, ALAMANUIA MA LEIPA.**

**Tupe Alu Faaopoopo Faatatauina 2021/2022.                      \$20,000**

E \$20,000 vaegatupe alu faaopoopo ua faatatauina i le 2021/2022 mo le Matagaluega o Pisinisi, Alamanuia ma Leipa e fesoasoani ai i le atinaeina o Asosi a tagata faigaluega ua auiliili atu i lalo:

- i. Samoa Workers Congress
- ii. Samoa Nurses Association
- iii. Samoa Seafarers and Maritime Association
- iv. Public Service Association

Na faafetaia e le Komiti le Matagaluega e tusa o taiala ua faaitiitia ma le vaegatupe faaopoopo ua faatatauina mo le atinaeina o faalapotopotoga ua taua i luga. Na fesiligia ai e le Komiti le agavaa e mafai ai ona resitala se faalapotopotoga e faamanuiaina i nei vaegatupe. O se fesoasoani taua e lagolago ai i galuega faatino mo le atunuu lautele.

Na faamanatu ai e le Komiti i le Matagaluega, ia mataitu lelei le faaaogaina o nei vaegatupe ua faamatuu atu mo faalapotopotoga, ia iai ni faiga faavae ma alafua e faamautinoa ai le faaaogaina tatau o vaegatupe ua tuuina atu.

O nisi o mataupu na laga a le Komiti, e aofia ai matatia ausia ma galuega faatino a le Matagaluega e fuafua i faamatalaga o tupe, o lo o totoe mo le isi

6 masina o le tausaga faaletupe o lo o faagasolo. E tatau i le Matagaluega ona mataitu lelei tusi Talosaga mo galuega faavaitaimi, ia mautinoa le leai o se aafiaga o aiga aemaise o le faaoga tatau o avanoa mo sailiga manuia i atunuu i fafo.

O le manatu maualuga o le Komiti, ia avanoa tutusa tagata uma mo nei avanoa ma e ao ai ona toe faatalatalanoa ma le aufaifaatoaga i Niu Sila ma Ausetalia i ni faiga talafeagai. E manatu foi le Komiti ina ia faatupulaia i latou e le i faamanuiaina muamua i nei avanoa ae ia tuutiitia le fuainumera o i latou na malaga muamua ma ia atagia le amio pulea o tagata ua faamanuiaina i nei avanoa. Na fautuaina foi le Matagaluega ina ia tausisia aiaiga na i ai maliega na faia i tulaga tau totogi ma isi tupe faaalu a le aufaigaluega ao le i tuua le atunuu mo galuega faavaitaimi.

E ao foi ona silasila totoa le Matagaluega i le faataatiaga o aiaiga talafeagai e faaitiitia ai faafitauli e aafia ai aiga ma le soifua maloloina o tagata faigaluega.

E fautuaina le Matagaluega o Pisinisi Alamanuia ma Leipa, ina ia faamalosia faiga faavae o le faaoga tatau o vaegatupe faamatuu atu mo faalapotopotoga, e faamautinoa ai o lo o talafeagai le faaogaina, e tusa o fuafuaga na talosagaina ai. E le gata i lea ia manino i faamatalaga o tupe ma oototoga o le faaogaina o le tai \$5,000 a le faalapotopotoga o lo o taua i luga ma ia faia aiaiga talafeagai e agavaa ai se faalapotopotoga e lesitala i le Matagaluega mo le faamanuiaga e faamatuu atu, e atinae ai Asosi ma lagolagosua ai i le Matagaluega tagata lautele o le atunuu.

#### **FAUTUAGA:**

I le maea ai o sailiiliga a le Komiti i vaegatupe alu faaopoopo faatatauina i le Tala Faatatau Faaopoopo Nu.1 o Tupe 2021/2022 mo le Matagaluega o Pisinisi, Alamanuia ma Leipa, e fautuaina ai le Fono Aoaofaitulafono e faapea:

1. Ina ia faamaonia le \$20,000 o vaegatupe alu faaopoopo faatatauina mo le Matagaluega o Pisinisi Alamanuia ma Leipa.

#### **6.3 MATAGALUEGA O TUPE.**

Tupe Alu Faaopoopo Faatatauina 2021/2022	\$4,339, 713
Faaitiitiga o Tupe Alu Faatatauina 2021/2022	(\$4,200,000)

E \$4,339,713 le vaegatupe alu faaopoopo ua faatatauina i le 2021/2022 mo le Matagaluega o Tupe ua auiliili i lalo:

i. Fetuunaiga o Totogi a le aufaigaluega	\$7,918
ii. Atinaeina o Faalapotopotogs ma Nuu (CSSP)	\$150,000
iii. Polokalame mo le Atinae o Uafu	\$3,149,239
iv. Faamalosia o Tui Puipui i le Pasefika (ADB)	\$150,000



v.	Mataituina o Aitalafu mai le Malo o Taupulega	\$52,154
vi.	Totogi o Lisi (Otahuhu)	\$830,402

O le polokalame mo le atinaeina o uafu, o se tasi o poloketi ua faatatauina iai le \$3.1 miliona o le sao o le Malo ma ua maea ona faia iai faatalatalanoaga ma paaga masani a le Malo. O se faatinoga ina ia mautinoa ai le faamalosi ma le faaleleia pea o le tulaga o le uafu (condition) aua le faatinoga o galuega masani aemaise o le faatautaiga o femalagaiga o lo o autovaa mai i lo tatou gataifale.

E \$830,402 ua faatatauina mo le totogiina o le lisi mo le fale i Otahuhu. Na taua e le Matagaluega o leni maliaga sa faia ma le Faalapotopotoga o Faalavelave Tutupu Faafuasei (ACC) e totogiina ai le fanua, ae o le a totogiina faalisi e le Matagaluega o Tupe le ACC mai le tausaga faaletupe ua tuanai seia oo mai i le tausaga faaletupe o faagasolo nei.

### **Faitiitia o tupe alu:**

i.	OPEC/Nofoaga mo Tane Suauu	(\$200,000)
ii.	Poloketi mo le Faaleleia o Fesootaiga	(\$550,000)
iii.	Faaleleia o Auala (ADB)	(\$350,000)
iv.	Tiute o Galuega faatupeina mai Meaalofa	(\$1,500,000)
v.	Lafoga VAGST Galuega faatupeina mai Meaalofa	(\$1,600,000)

E \$200,000 ua faaitiitia ai tupe alu a le Matagaluega mo le nofoaga mo tane suauu. Na faailoa mai e le Matagaluega, ua i ai galuega ua tuai ona faatino ona o aafiaga o le faamai Koviti-19 i le lalolagi ma ua mafua ai ona faamauina le faaitiitia. O lo o faia pea faatalatalanoaga i le faaauauina o leni poloketi.

Ua faatatauina le faaitiitiga o tupe alu e \$550,000 mo le poloketi mo le faaleleia o fesootaiga aemaise o le faatinoina o le National ID. Peitai ona o le tuai o le faataunuuna o le Tulafono mo lea poloketi, ua mafua ai le faaitiitia o le vaegatupe manaomia ma toe fetuunai ai galuega faatino e aofia ai le faatinoina o tauofoga.

Ua faaitiitia Tiute ma Lafoga o galuega e faatupeina mai meaalofa e pei ona taua i luga, ona o aafiaga lava o le Koviti-19 ma ua faatuai ai le faatinoina o nisi o atinae tetele a le Malo e aofia ai le Aoga Faapitoa mo Leoleo (Police Academy) faapea le fausia o faleaoga i nisi o alalafaga e faatupeina e le Malo o Saina.

E \$350,000 le faaitiitiga o tupe alu mo le poloketi o le faaleleia o auala ona o le tuai faatino o tauofoga mo le vaaavaaia o leni galuega (supervision). Na faailoa e le Matagaluega e ono faataunuuna leni galuega i le tausaga faaletupe 2022/2023, ma o lo o i ai pea le \$150,000 o lo o toote i lalo o leni galuega, o galuega faatino ma galuega faaauau.

### **FAUTUAGA:**

I le maea ai o sailiiliga a le Komiti i vaegatupe alu faaopoopo faatatauina I le Tala Faatatau Faaopoopo o Tupe Nu.1 2021/2022, e fautuaina ai le Fono Aoaofaitulafono.

1. Ina ia faamaonia le \$4,339,713 o vaegatupe alu faaopoopo faatatauina mo le Matagaluega o Tupe.
2. Ina ia faamaonia le (\$4,200,000) o le faaitiitiga o vaegatupe alu faatatauina a le Matagaluega o Tupe.

### **6.4. MATAGALUEGA O MATAUPU TAU LE VA I FAFO MA FEFAATAUAIGA.**

Tupe Alu Faaopoopo Faatatauina 2021/2022 - **\$516,129**

E \$516, 129 vaegatupe faaalu faaopoopo faatatauina mo le Matagaluega o le Va i Fafoma Fefaatauaiga ua auiliili atu i lalo.

i.	2 taavale fou mo malo faaaloologia	-	\$278,261
ii.	Alauni ma tupe alu mo le failautusi muamua i Kanepera		\$182,250
iii.	Avanoa faigaluega mo le Loia	-	\$13,879
iv.	VAGST	-	\$41,739

O le vaegatupe mo taavale fou e pei ona taua e fuafua mo taligamalo i totonu o le atunuu e feaveai ai malo faaaloologia pe a autovaa mai mo ni sauniga tetele ma fonotaga e talimalo ai Samoa.

O le vaegatupe mo le avanoa faa-failautusi i Kanepera, o se avanoa fou e faaopoopo i le High Komesina ma le Faufaatua i Ausetalia. Na taua e le Matagaluega, o lea avanoa faigaluega, o le a gafa ma le vaaia o tamaiti sikolasipi, mai aafiaga ua aafia ai le lalolagi, faatasi ai ma le mataituina o le suiga o auala ua faaoga mo aoga ma le puipuiga o le saogalemu o fanau silolasipi i Ausetalia.

O le \$13,879 e faatupeina ai le avanoa faigaluega mo le Loia, ina ua maea ona faia le toe faatulagaina (restructure) o le Matagaluega ma ua faamaonia e le Komisi o Tagata Faigaluega a le Malo ma le Matagaluega o Tupe.

Na fautuaina e le Komiti le Matagaluega ina ia mataitu lelei taiala ma faiga faavae mo le malu puipua o le atunuu lautele, e le gata o faamai ua aafia ai le lalolagi, aemaise o suiga ogaoga o le tau ua aliae mai. E manatu foi le Komiti, e ao ona faamalosi faiga faavae, e uunaia ai le faatinoina o tui puipui ma faamaumauga mo le mautinoa o lo o saogalemu pea tagata lautele o le atunuu.

**FAUTUAGA:**

I le maea ai o sailiiliga a le Komiti i vaegatupe alu faaopoopo faatatauina i le Tala Faatatau Faaopoopo Nu.1 o Tupe 2021/2022 mo le Matagaluega o Mataupu tau le Va i Fafu ma Fefaatauaiga, e fautuaina ai le Fono Aoao Faitulafono.

1. Ina ia faamaonia le \$516,129 o vaegatupe alu faaopoopo faatatauina mo le Matagaluega o Mataupu tau le Va i Fafu ma Fefaatauaiga.

**6.5. MATAGALUEGA O PUNAOA FAALENATURA MA LE SIOSIOMAGA.**

Tupe Alu Faaopoopo Faatatauina 2021/2022 - \$493,719

E \$493,719 vaegatupe alu faaopoopo faatatauina mo le Matagaluega o Punaoa Faalenatura ma le Siosiomaga ua auiliili atu i lalo.

**Faaopoopoga i Tupe Alu.**

i.	Galuega Lagolago i le Minisita	\$457,724
	a. Tagata Faigaluega	\$146,402
	b. Galuega Faatino	\$153,007
	c. Faatauina o Aseta	\$ 86,956
	d. Galuega lagolago	\$ 71,359
ii.	VAGST	\$35,995

**Faaitiitia o Tupe Alu**

i.	Galuega lagolago	(\$71,359)
----	------------------	------------

O vaegatupe ua auiliili atu i lalo o galuega lagolago i le Minisita, e mo le faaleleia ma le faatotogaina o le Ofisa o le Minisita, e pei ona faasee ese mai ai mai matafaioi ma galuega faatino a le Afioga i le Palemia. E aofia i nei vaegatupe totogi o tagata faigaluega faaopoopo, ma aseta mo le faatinoina o galuega e lagolago ai i le Minisita.

O le faaitiitia o tupe alu ua faamauina, o lea vaegatupe ua faasee ese mai Fautuaga Tau Faiga Faavae i le Minisita e pei ona faamauina i lalo o galuega faatino 1 a le Matagaluega, ma tuuina atu i lalo o Galuega Lagolago i le Minisita e pei ona taua i luga.

O nisi o mataupu na laga e le Komiti e aofia ai fautuaga i Faiga Faavae e faamausaili ai le puipuiga o le siosiomaga mai le aafia i suiga o le tau, mataupu tau lisi ma le fuaina o fanua, atinaeina o le sami ma le vaomatua ma aafiaga o mala faalenatura.

Na fautuaina ai e le Komiti le Matagaluega, ina ia lelei ona faasoasoa vaegatupe tuuina atu mo atinae a le Matagaluega, ia ogatasi ma alafua e tusa o le faatalosagaina o vaegatupe faaopoopo. Ia atagia i le Faamatalaga o Tupe le faaoga tatau ma le talafeagai o vaegatupe tuuina atu, faatasi ai ma Tupe Maua a le Matagaluega.

#### **FAUTUAGA.**

I le maea ai o sailliliga a le Komiti i vaegatupe alu faaopoopo faatatauina i le Tala Faatatau Faaopoopo Nu.1 o Tupe 2021/2022 mo le Matagaluega o Punaoa Faalenatura ma le Siosiomaga, e fautuaina ai le Fono Aoaofaitulafono.

1. Ina ia faamaonia le \$493,719 o vaegatupe alu faaopoopo faatatauina mo le Matagaluega o Punaoa Faalenatura ma le Siosiomaga.
2. Ina ia faamaonia le (\$71,359) o le faaititiga o vaegatupe alu faatatauina a le Matagaluega o Punaoa Faalenatura ma le Siosiomaga.

#### **6.6. MATAGALUEGA O LEOLEO MA FALEPUIPUI.**

##### **Tupe Alu Faaopoopo Faatatauina 2021/2022      \$480,410**

E \$480,410 vaegatupe alu faaopoopo faatatauina i le 2021/2022 mo le Matagaluega o Leoleo ma Falepuipui ua auilili atu i lalo.

- |     |  |           |
|-----|--|-----------|
| i.  | Fausiaina o le Pa mo le Ofisa i Salelologa | \$417,748 |
| ii. | VAGST                                      | \$62,662  |

E \$417,748 ua faatatauina mo le fausiaina o le pa mo le Ofisa i Salelologa. O le naunautaiga o le Matagaluega, o le malu puipuia o le Ofisa i lea nofoaga o le a malu puipuia ai foi tagata fegasoloai o le atunuu mai tagata solitulafono o lo o taofia i le Matagaluega. O le faatuina foi o le ofisa a le Matagaluega i Salelologa, o le a avea ma nofoaga tutotonu mo le mamalu o le atunuu i Salafai, e faafaigofie ai le fegasoloaiga ma le faatinoga o galuega a le Matagaluega aemaise o le tausiga ma le malu puipuia o le saogalemu o tagatanuu.

Na fautuaina foi e le Komiti le Matagaluega, ina ia silasila totoa i le faamalosiaina o faiga faavae ma alafua e limataitaiina ai le amiotonu o galuega faatino a le Matagaluega, aemaise o le uunaia o aoaoga o le amio pulea mo i latou o lo o i le toese aua se suiga lelei i le lumanai e fesoasoani ai i le toefuataina o le ola faale-agaga, faapea le tausiga o aiga, afioaga ma alalafaga.

## **FAUTUAGA.**

I le maea ai o sailiiliga a le Komiti i vaegatupe alu faaopoopo faatatauina i le Tala Faatatau Faaopoopo Muamua o Tupe 2021/2022 mo le Matagaluega o Leoleo ma Falepuipui, e fautuaina ai le Fono Aoaofaitulafono ma Falepuipui, e fautuaina ai le Fono Aoaofaitulafono ma Falepuipui.

1. Ina ia faamaonia le \$480,410 o vaegatupe alu faaopoopo faatatauina mo le Matagaluega o Leoleo ma Falepuipui.

## **6.7. MATAGALUEGA O GALUEGA, FELAUAIIGA MA ATINAE ESEESE.**

**Tupe alu Faaopoopo Faatatauina 2021/2022      \$4,100,000**

E \$4,100,000 vaegatupe alu faaopoopo faatatauina mo le Matagaluega o Galuega Felauaiga ma Atinae Eseese ua auiliili atu i lalo.

- |      |                                       |             |
|------|---------------------------------------|-------------|
| i.   | Faalapotopotoga Pulega o Suavai       | \$2,000,000 |
| ii.  | Faalapotopotoga Malosiaga Tau Eletise | \$2,000,000 |
| iii. | Fautuatusiina o Auala                 | \$100,000   |

Na taua e le Matagaluega, e tai \$2 miliona le vaegatupe faaopoopo ua faatatauina mo le Pulega o le Suavai ma le Faalapotopotoga o Malosiaga Tau Eletise, e taua atu i le Matagaluega o Galuega. Na maua foi le avanoa e faatalanoaina ai e le Komiti nei vaegatupe faaopoopo ma Faalapotopotoga e pei ona taua.

### **Pulega o le Suavai.**

O le vaegatupe faaopoopo faatatauina mo le Pulega, e mo le faaleleia o pamuvai e vili ma faamama ai le suavai ina ia mautinoa le saogalemu mo le fofoga taumafa o le atunuu. O le tulaga o pamuvai, na o le 2 pamu e faasoasoina le suavai i se vaega o le atunuu, e 1 e faaoga ae o le isi e faaleoleo nei i ai ni vaega e le o mafai ona oo i ai le suavai ona faaoga lea. O le manulauti a le Pulega, ia tuuina atu le suavai mama ma ia mautinoa le saogalemu mo le faaogaina e tagata uma.

### **Faalapotopotoga o le Malosiaga Tau Eletise.**

O le vaegatupe faaopoopo mo le Faalapotopotoga, mo le faaatinoina o moli auala (streetlights) ma le faaogaina atu o le eletise ia maua uma e tagata le eletise manaomia i aso uma. Na faailoa foi e le Faalapotopotoga o le totagiina o le eletise mo moli auala, e oo atu lona tau aofai i le \$3.6 miliona i le tausaga, peitai e le o faaitiitia le talosaga mai o le mamalu o le atunuu i le manaomia pea o lena auaunaga.

O le vaegatupe e \$100,000 ua faatatauina mo le Matagaluega o Galuega Felauaiga ma Atinae Eseeese, mo le faatinoina o le poloketi e faatuatusaina ai auala, e le gata i nofoaga tu taulaga ae ua agai atu foi i nuu i tua. Ua maea le isi vaega mai Laulii i Puipaa, o le faamoemoe o le Matagaluega ia aofia uma le atunuu atoa, e le gata i Upolu ae ia faapena foi Savaii e faafaigofie ai femalagaiga.

### **FAUTUAGA**

I le maea ai o sailiiliga a le Komiti i vaegatupe alu faaopoopo faatatauina i le Tala Faatatau Faaopoopo Nu.1 o Tupe 2021/2022 mo le Matagaluega o Galuega, Felauaiga ma Atinae Tetele, e fautuaina ai le Fono Aoao Faitulafono.

1. Ina ia faamaonia le \$4.1 miliona o vaegatupe alu faaopoopo faatatauina mo le Matagaluega o Galuega Felauaiga ma Atinae Tetele.
2. Ina ia faamaonia le \$2 miliona o vaegatupe alu faaopoopo faatatauina mo le Pulega o le Suavai e auala atu i le Matagaluega o Galuega, Felauaiga ma Atinae Tetele.
3. Ina ia faamaonia le \$2,000,000 o vaegatupe alu faaopoopo faatatauina mo le Faalapotopotoga o Malosiaga Tau eletise, e auala atu i le Matagaluega o Galuega, Felauaiga ma Atinae Tetele.
4. Ina ia faamaonia le \$100,000 o vaegatupe alu faaopoopo faatatauina mo le Matagaluega o Galuega, Felauaiga ma Atinae Tetele.

### **6.8 OFISA O LE FONO AOA O FAITULAFONO.**

<b>Tupe Alu Faaopoopo Faatatauina</b>	<b>-</b>	<b>\$80,000</b>
<b>Faaitiitia o Tupe Alu Faatatauina</b>	<b>-</b>	<b>(\$80,000)</b>

Ua faatatauina le vaegatupe alu faaopoopo e \$80,000 mo le Ofisa ua auiliili atu i lalo.

- |     |                              |   |          |
|-----|------------------------------|---|----------|
| i.  | Galuega faatino (Output 2.0) | - | \$35,000 |
| ii. | Galuega faatino (Output 3.1) | - | \$45,000 |

I sailiiliga a le Komiti na maua ai o lo o fetuunai vaegatupe faatatau faaopoopoo o tupe a le Ofisa vaegatupe e pei ona taua i luga, peitai ua maua e le Komiti, e le o sao galuega faatino o lo o faatulaga i ai nei vaegatupe. E tatau ona toe fetuunai i galuega faatino sao e pei ona faailoa atu i lalo.

- |     |                              |   |          |
|-----|------------------------------|---|----------|
| i.  | Galuega faatino (Output 2.0) | - | \$45,000 |
| ii. | Galuega faatino (Output 3.1) | - | \$35,000 |

Na taua e le Ofisa o le \$45,000 ua faatatauina i lalo o galuega faatino 2. Auunaga i le Ofisa o le Failautusi e faatumu ai se vaega o le vaegatupe na faatau ai le taavale mo le Taitai o le Itu Agai e tusa ma faiga masani ma aloaia i Paeaiga taitasi. O le tau atoa o le taavale (SUV Prado) e \$184,000 ma na faatupeina uma mai i vaegatupe i lalo o Galuega faatino 2, e pei ona taua i luga.

Na maua e le Komiti o lenei taavale sa masani ona faatupeina mai tala o tupe a le Matagaluega o Tupe, peitai i le usitaia e le Ofisa o le faaiuga a le Kapeneta (FK (21) 41 o le aso 27 Oketopa 2021, na faatupeina ai lava i lalo o le Ofisa o le Failautusi o le Fono Aoaofaaitulafono.

Na taua e le Ofisa o le \$35,000 ua faatatauina i lalo o Galuega Faatino 3.1, mo ana galuega faatino faaauau e tautuaina ai fonotaga a le Palemene o lo o totoe i le tausaga faaletupe 2021/2022

O le aofaiga e (\$80,000) o le faaitiitiga o tupe alu a le Ofisa mai ana galuega mo Polokalame faale-aoaoga, ma ua toe fetuunai mo le faatino o ana galuega e pei ona taua i luga. Na taua e le Ofisa, o le faigata o le faaauauina o ana polokalame faapalemene mo alo ma fanau aoga, ona o le finagalo o le Matagaluega o Aoga, Taaloga ma Aganuu i le faalavelaveina lea o fanau aoga mai a latou polokalame faataatitia o le tausaga, talu mai aafiaga o aoga a fanau i le faamai o le misela faasolo mai ai i le Koviti-19. Peitai e manatu le Komiti, e ao i le Ofisa ona taumafai e galulue faatasi ma le Matagaluega o Aoga, mo le faaauauina o ia polokalame taua, ma fua agai i fuafuaga faataatitia a le Matagaluega o Aoga. E i ai le talitonuga a le Komiti, e tele se sao taua o nei polokalame mo le fanau lalovaoa a le atunuu, latou te malamalama ma silafia ai taualumaga ma galuega faatino a le Palemene ma le Ofisa mo le lumanai.

#### **FAUTUAGA.**

I le maea ai o sailiiliga a le Komiti i vaegatupe alu faaopoopo faatatauina i le Tala Faatatau Faaopoopo Nu.1 o Tupe 2021/2022 mo le Ofisa o le Fono Aoaofaaitulafono, e fautuaina ai le Fono Aoaofaaitulafono.

1. Ina ia teuteuina le Tulafono Tau Faaofi o le Faatatauina o Tupe Faaopoopo Nu.1 Fono aoaofaaitulafono, i galuega faatino, sao e tataua ona faatatauina i ai, e faapea,

i.	Galuega Faatino (Output 2.0)	-	\$45,000
ii.	Galuega Faatino (Output 3.1)	-	\$35,000
2. Ina ia faamaonia le \$80,000 o vaegatupe alu faaopoopo faatatauina mo le Ofisa o le Fono Aoaofaaitulafono
3. Ina ia faamaonia (\$80,000) o le faaitiitiga o vaegatupe alu faatatauina a le Ofisa o le Fono Aoaofaaitulafono.

## 7. IUGAFONO.

I le maea ai o ana iloiloga, ma faaiugafonoina ai e le Komiti o Tupe Maua ma Tupe Totogi e fautuaina ai le Fono Aoao Faitulafono ina ia faamaonia le P.P.2021/2022 Nu 14. Tala Faatatau Faaopoopo Muamua o Tupe Maua ma Tupe Totogi a le Malo o Samoa mo le Tausaga Faaletupe e faaiuina i le aso 30 o Iuni 2022.

Lau Afioga i le Fofoga Fetalai, o lo o sainia lenei lipoti, e le Taitaifono, Sui Taitaifono ma sui mamalu uma o lenei Komiti.

Lau Afioga i le Fofoga Fetalai, ona ou toe oo mai lea i le mamalu o si ou itumalo, e faaiu atu ai se faamatalaga. Le paia e o lo tatou itumalo, o lea ua outou faafogafoga mai, ua tofia au e le mamalu o le Faigamalo ma lenei Palemene, e fai ma Taitaifono o le Komiti o Tupe Maua ma Tupe Totogi. E i ai le talitonuga o le tatou sui usufono, e le ona o au la outou sui usufono, ae o le faailoga lea o le vaai maualuga, o le Faigamalo ma le Palemene o Samoa i lau tapuaiga le paia o lo tatou Malo. E i ai le talitonuga, e le o se mitamitaga ia te au nei, a o le agaga e ao ona toe faafoi atu le faafetai tele i le paia o le tatou tapuaiga. Aemaise o susuga i faafeagaiga o lo o nonomanu i lea aso ma lea aso, o lea ua ae manuia ai faiva ma galuega o la outou sui usufono.

Le paia o le tatou itumalo ia faamanuia le Atua i la outou tapuaiga a o alofaiva lo outou sui usufono aua upufai o Malo.

Lau Afioga i le Fofoga Fetalai, e le faaitiitia le agaga faafetai e fia faaleo i na i ou aiga, o lo o tapuaia ou faiva e le gata i Samoa nei, ae faapea foi i atunuu mamao. E le o faagaloina la outou tapuaiga, faafetai i la outou faamalosiua ma la outou faalototele o lea ua ae manuia ai ma lototele ai le sui usufono mo Gagaifomauga Nu 2.

Lau Afioga i le Fofoga Fetalai, e momoli foi lau faafetai tele i lau faifeau, susuga i le faafeagaiga ia Muao ma le faletua ia Tauvela o lo o tapuaia ou faiva i le EFKS i Vaitele Uta, e faapea foi si au aulotu EFKS, faafetai tatalo, malo le tapuai. Ia i ai manuia o le Atua i outou pa.

Lau Afioga i le Fofoga Fetalai, e le itiiti foi lau faafetai e faaleo i le Afioga i le Minisita o Faatoaga, i le faalototele mai pea ma le aumai o le tuualalo, a o taumafai ai le taumafaiga o lenei tofiga ua faaee mai e le Malo. O lau lava faamalosiua, ia aua le viia le tagata, ae ia viia le Atua e ou le malosi ma le potu. Ma e te faamanatu mai pea le tatou mau tauave a o taumafai le tatou faiga palota, ia lototele ma onosai. Ua faafetai faamalosiua i lau Afioga i le Minisita, faafetai faalototele.

E i ai le talitonuga lau Afioga i le Fofoga Fetalai, o lea ua matua manino le lipoti a le Komiti lenei ua folasia i lumamea aemaise le laulau-a-fono.

Ma e le itiiti le agaga faafetai o le Taitaifono ma le Komiti, i le paia o Matagaluega, o e sa fuafua ma tau faatatauina seleni aua lenei lipoti o tupe ma le Tala Faatatau Faaopoopo Nu.1. E ui lava ina utiuti le seleni e pei lava ona avatu i le taimi ua sola.



O le Komiti lenei, a manino le tatou faasoa, e manuia foi lo tatou atunuu. O lo o tapuaia o tatou faiva e le tatou atunuu. O le tatou auai i totonu o le Maota o Samoa, o le tatou lufilufilima lelei aua lava le tapuaiga a na i o tatou tagata.

E momoli le faafetai i Matagaluega, aemaise foi o la outou faasoa e le gata ina utiuti a o lo o taumafai pea aua le atinaeina o le tatou Malo.

E le itiiti foi le agaga faafetai lau Afioga i le Fofoga Fetalai, e momoli atu i le tapuaiga a Ofisa Sili o Pulega o Matagaluega. O outou lava o lo o tua i ai le Faigamalo, ua avatu foi se fautuaga, ia tatou galulue faatasi pea aua le sologa lelei o faiva i totonu o lenei Paeaiga i lenei 5 tausaga. O le tatalo lava, ia i ai manuia o le Atua ia outou galuega.

Lau Afioga i le Fofoga Fetalai, e fia oo lava se faamatalaga i tulaga o lenei vaitau. Ua tatou i ai i tulaga le mautonu ona o le oo mai o le faamai i totonu o le tatou atunuu. E le itiiti le agaga faafetai e faaleo i le Palemia, ma le Kapeneta, e le gata ina mafatia ona o le taumafaiga o auala aua le puipuiga o Samoa. A o lo o faapea lava ona vaia le tele o faamatalaga e le tusa ai. Ae momoli le faafetai tele i lo outou lototetele ma lo outou onosai. Ua outou faamuamua lava le vaavaai i le puipuiga malu o Samoa, ae ua faatuatuanai vaega e le maua ai so tatou nofo lelei.

O le agaga o le Komiti ma le Taitaifono, i lau Afioga i le Fofoga Fetalai, i le faafogafoga mai o Samoa, aemaise o le faamaninoina o le lipoti a le Komiti lenei.

Ona faapau mai lea i i se faamatalaga, ia manuia lau Afioga i le Fofoga Fetalai, aua le feagai ai ma lou tofi, tiute ma lou valaauina. Ia maua pea lou toa mai le Atua, maua lou lototele aua le faatinoina o le Fono a lo tatou atunuu.

Ia alofagia foi le faatafa o le Sui Taitaifono po o le Taitai o le Itu Agai, ia maua lona malosi e toe faaauuina ai feau ma galuega.

Ia faamanuia le Atua i le Palemene o Samoa, ia faamanuia foi le Atua i le faafogafoga mai a lo tatou atunuu, ma ia i ai pea aao faamalolo o le Atua i luga o Samoa, a o tatou i ai i nei vaitau faigata. Soifua ma ia manuia.

**FOFOGA FETALAI:** Ua faamalo faafetai saunoa i lau Afioga i le Taitaifono o Komiti o Tupe Maua ma Tupe Totogi, po o le sui usufono mamalu mo Gagaifomauga Nu 2, po o lau Afioga i le Sui Minisita Lagolago o Faatoaga.

E talitonu o lea ua faafogafoga ma le totoa le mamalu o le Palemene, i lau saunoaga auiliili ma le manino. E talitonu foi, e taua foi le folasaga e pei ona tuuina mai. Na aumai foi le fautuaga a lea foi Itu, ona o tulaga sa masani mai ai le Palemene, e na o fautuaga e tolaulau. Ae peitai e ese foi lagona ina ua faatino mai le matafaioi a lau afioga i le Taitaifono ma le Komiti. O le taua o lo o faafogafoga le mamalu o le atunuu, i le faaogaina o tupe nei e faaogaga a le Malo, o le taua lea i le faalogologo a le Nofoa.

O le mea lea, o lea ua faafofoga ma le totoa le Palemene, aemaise foi o le faafofoga a le atunuu, o lo o manino lava le faaogaina o tatou tupe, ina ia manino mea uma.

Ia faafetai, malo i lau afioga i le Taitaifono, e talitonu e pei ona e amanaiaina sui o la outou Komiti, o sui sinia o lea itu, ia malo faafetai. E le o alo foi lou amanaiaina, e pei ona e saunoa ma aumai i luma o le Palemene, le aoga ma le taua o nei foi tama matutua o le Maota.

Ia aemaise foi o fautuaga i Ofisa Sili o Pulega o Matagaluega, ina ia galulue faatasi, aemaise le talanoaina o le tamaoiga ma le itu tau tupe. Malo tapena. E talitonu foi o lea ua manino atoatoa le Maota, aemaise foi o le aoga foi lea i le taimi e auiliili ai le Tala Faaopoopo o le tupe, o lea ua e auiliiliina lelei mea uma. Ou te talitonu foi o le a faafaigofie ai le tatou galuega. O le mea lea, malo faafetai, malo saunoa. O lea foi ua e oo i lou itumalo, ia malo faafetai.

Ou te talitonu o lea ua maea saunoaga faalauaitele a sui usufono mamalu, aemaise foi o le Taitaifono ma le Komiti, mo le Tala Faatatau Faaopoopo Nu.1 2021/2022.

Ou te talitonu foi, o le avanoa lelei lenei, e lafo atu ai i lau Afioga i le Palemia, mo le faagasologa o tali a le Malo mo mataupu sa laga mai e sui usufono mamalu.

Lau Afioga i le Palemia.

**Afioga Hon FIAME NAOMI MATAAFA:** Faafetai i lau Afioga i le Fofoga Fetalai mo le avanoa. Ua mavae atu ia le faagasologa o le tatou galuega, e pei ona faataatia ai le Tala Faatatau Faaopoopo Nu.1 o le Tala o le Tupe, e pei ona folasia e le Minisita o Tupe. O le folasaga lava lea a le Pulega po o le Faigamalo. Ua saunoa foi sui usufono mamalu o le Maota, taualuga i le saunoaga a le Taitaifono o le Komiti o Tupe a le Palemene. Atonu i le faagasologa lava o galuega faale-Palemene, o ala lava ia e masani ona tatou uia. Ma e taua tele ia lipoti a tatou Komiti, aua o i latou ia o lo o gafa ma le iloiloina o fuafuaga o lo o faataatia atu e le faigamalo po o le Pulega mai lea taimi i lea taimi.

Lau Afioga i le Fofoga Fetalai, e aoga foi le faafesili mai a le Sui Taitai o le Itu Agai, ma sa mataituina foi le talifuaitau a lau Afioga i le Fofoga Fetalai, i le ma le isi, o se finagalo faaalua foi o le Taitaifono, i le faafoeina o le faailoa o a tatou Lipoti e faataatia i luga o le Laulau a Fono aemaise Lipoti a tatou Komiti o le Palemene.

O le mea moni lava lau Afioga i le Fofoga Fetalai, ua fai foi sina umi ou te le i toe faalogo o faitau se Lipoti a se Komiti i totonu o le Maota. Atonu e aoga foi i le tatou tau amata ai i lenei Paeaiga se i tatou vaavaai i ai. Ia atonu o lea e feoloolo mai na o le 8 Matagaluega ia e autu i ai le tatou Tala Faatatau Faaopoopo Nu.1, ae ou te masalo o le Tala Autu e fai uma Matagaluega. A o itu uma lava ia i lou lava taofi faa-Taitai o le Malo, e lafo atu pea i se

lagona faa-Palemene, ona e eseese a tatou matafaioi, tatou te nonofo faatasi o tatou o sui tautua o itumalo, sui usufono o le Palemene, ae ese foi le saofaiga a le Pulega o lo o afifio atu, le faigamalo. A o faavae lava ia o lo o faavae ai i luga le tatou faigamalo o lo o i ai. A o le aano lava ia ma le faavae o le tatou galuega, o galuega faa-Palemene tatou te nonofo e faafeagai.

Lau Afioga i le Fofoga Fetalai, e augofie foi le mafaufau tatou te toe vaai i le faagasologa o a tatou galuega i totonu o le Palemene. Ma o le isi mea ua oo i ai lou mafaufau, o le mea muamua o le process, Parliamentary process, o le faagasologa o galuega faale-Palemene. Ia, o le matafaioi lea a lau Afioga, matou te lagolago atu foi, saunoa mai foi le la Itu pe faapefea ona faafoe, ia ma o lea foi e taimuaina tatou e tatou Tulafono Tumau. Ae ua ou mafaufau foi i le Lipoti lava ia a le Komiti o Tupe aua o le isi Komiti lea e uumi ana Lipoti ma e fai soo ana Lipoti i totonu o le Palemene. O lea la ua ou mafaufau lau Afioga, e avatu foi i luga o le Laulau a Fono tatou te mafaufau faatasi i ai, po o le a le mea e le muamua ai ona faitau le Lipoti a le Komiti e amata ai le tatou felafolafoaiga, aua o lea ua saunoa uma, ae mulimuli mai le Lipoti a le Komiti, a ua uma tala ma upu. E pei la o itu na e taua ai le mataupu ua laga mai e le Sui Taitai o le Itu Agai tatou te mafaufau atili i ai.

Ma ou te manatu foi, e sao foi le finagalo faaalua o le Taitaifono o le Komiti, ioe, tatou te faitau i a tatou Lipoti. E mafai foi ona tatou talanoa ma tatou talanoa agai i le Lipoti, a o le tino o le Lipoti aemaise ni ona fautuaga o lo o aumai ai, ia, pei o lea faatoa maua i le atoatoaga e pei ona tolaulau mai e le Afioga i le Taitaifono, le taua foi lea o le a ea le mea e faasalalau ai fonotaga nei. O le a le taua? Ona o la e faalogologo mai le atunuu. Ia, o le vaega muamua lena, e taua foi le tatou mafaufau faatasi, a o lo o fagasolo le tatou Paeaiga lenei 17 o le Palemene.

Lona lua lau Afioga i le Fofoga Fetalai, ua tatou toe auvaa potopoto mai i lalo lava o Poloaga foi lea o a tatou Faalavelave Faafuasei, ae le o se mea fou faapea o lea faatoa tupu. O lea ua ova i le 2 tausaga talu ona tatou gaoioi pea i lalo o Poloaga ia. E sui mai lea Poloaga i lea taimi ma lea taimi, ae o le faamalumu lava lea o lo o malaga pea ma i tatou, aemaise lenei vaitau o le faamai o le Koviti-19. I lalo o Poloaga e pei foi ona faataatia i le Laulau a Fono, o lo o faapena lava ona tuuavanao mai ai ma faatau le galuega a le Palemene ma le Kapeneta ina ia faaaau le faagaioiga o le Malo.

Ona ou oo mai ai lea lau Afioga i le faagasologa o le tatou galuega o le Tala o le Tupe Faaopopo Nu.1. Ma e pei foi ona malie i le saunoaga a le Afioga i le Taitaifono o le Komiti, ia, e na o le 8 tatou Matagaluega ia o lo o autu i ai le Tala o le Tupe. Ma e i ai foi se lagona o au faa-Taitai, ia se i tau tata mai i totonu le tatou galuega, o lea e tatou te fia maua foi le taunuu o se faaiuga o le tatou mataupu lenei, ma tuutiitia ai foi le tatou potopoto faapenei i te i ua tupu se mea pepesi le faamai i totonu o le tatou Maota Fono.

O lea la ou te manatu ai lau Afioga i le Fofoga Fetalai, o le a le afaina le faagasolo pea i le tulaga masani, o le saunoa atu po o le talifuaitau o Minisita e tusa ai foi ma le tatou felafolafoaiga. Ae tau ina matou faapea atu e tuualalo, e lelei lava le autu i Minisita o lo o i ai a latou tupe i totonu o le Tala o le Tupe, ia vagana ai lava e i ai se mataupu ogaoga po o se tulaga lautele foi lea e le faapea e patino i le Matagaluega, ae aafia ai le atunuu atoa. Ia, e fai ma faataitaiga pe a o le Afioga i le Sui Palemia, a tatou talanoa loa i lafoga, e lavea uma ai lava tagata uma, ae le o i ai le Matagaluega a le Afioga i le Minisita i tatou Matagaluega ia e 8 lea o lo o aumai i le tatou Tala Faaopopo Muamua. A o le agaga lena i le faafogafoga mai foi a le tatou Aiga Kapeneta, ia o le tele o saunoaga faamau ane, a o a outou Afioga o lo o i ai tupe o lo o faatatau i lalo o le tatou Tala o le Tupe lea, ia tapena lelei mai tou te saunoa i aiaiga o le tatou Tulafono ma tupe ua faatatau mo a outou Matagaluega.

Ou te manatu lau Afioga i le Fofoga Fetalai, o le tatou felafolafoaiga i le Tala o le Tupe Autu, o i ina foi na faaalua ai foi finagalo o Afioga i sui usufono i mataupu eseese, lea foi o lo o faaauauina mai foi i le tatou felafolafoaiga i le Tala o le Tupe Faaopopo. Ma ou te manatu o le mea taua o le faamauina pea o finagalo ua faaalua ae tatou agai i le tupe o lo o faaagaaga mo le Tala o le Tupe Faaopopo Nu.1.

E matauina foi lau Afioga i le Fofoga Fetalai, e fai mai lava tatou Tulafono Tumau, o le tatou felafolafoaiga i luga o le Tala o le Tupe Autu po o le Tala o le Tupe Faaopopo, tatou te talanoa i luga o le tulaga o faiga faavae. Ae ou te matauina pea i le faagasologa mai o auga nofoaiga o le Palemene, e faapea lava le faatinoina o le felafolafoaiga lea. Muamua, o manaoga foi lea e faamalau mai manaoga o itumalo. Ma ou te le faapea atu e le o le sao lea, ae tatou te talanoa i manaoga i luga po o a faiga faavae o lea o lo o faataatia e le faigamalo mai lea taimi i lea taimi. O le tele foi o saunoaga, o faamalamalama mai ai foi se finagalo o se sui usufono. Ma ou te manatu e taua foi lea, aua o i ina e fili mai ai foi manatu e fau ai se mataupu po o se faamoemoe.

Ia ma le isi vaega e matauina pea i saunoaga i luga o tatou felafolafoaiga i Tala o Tupe, o le tuualalo i le faigamalo i mataupu eseese, tuualalo ma le fautuaga.

E faalogologo lava ma le totoa i saunoaga a le Maota, aemaise lena Itu o le Maota, foi lea, aua o lea e tuliloaina, po o a nisi mea o lo o aumai e poupouina ai foi po o suesueina ai foi le atoatoa o se tapenaga a le Malo o lo o faia i lea taimi ma lea taimi.

Lau Afioga la i le Fofoga Fetalai, e i ai lava le faamoemoe foi lea i le tatou faaauau o le tatou faigamalaga i lenei Paeaiga, e mafai ona siitia le tatou felafolafoai i le mea lava lea e fai mai ai le tatou Tulafono Tumau, tatou talanoa i faiga faavae.

O le mea moni lava, e laitiiti lava le taimi ou te maua ai se finagalo faaalua o lea e talanoa i luga o le tulaga lea. E fai ma faataitaiga, o le saunoaga a le sui usufono o Falelatai ma Samatau. I lana saunoaga muamua lava i le tatou Tala o le Tupe Autu, foi lea e saunoa mai i faavae, aemaise o faavae faale-tamaoiaiga lea e pei e i ai lona silasila o lea e agai atu i ai le faigamalo lenei. Na faapea mai lona finagalo, o lana silasila, o le faigamalo lenei e lilifa lana faiga faavae i mataupu tau tamaoiaiga i le tuuina atu lea o tupe po o investment i tagata lautele o le atunuu. Ia te au lava la ia, ou te fiafia i le ituaiga talanoaga lea, aua foi lea, o mea autu ia o lea e fau ai i luga le vaaiga a se faigamalo mai lea taimi i lea taimi. E taua la... malie foi le Afioga i le sui usufono po ua ou faaaogaina lana saunoaga e fai ma faataitaiga o le faamoemoe lea i le tatou feofofoai i luga o faiga faavae. Aua a tatou talanoa pea po o ai e fai lona auala a o ai e le faia lona auala, o ai e fai lona taligalu, ou te manatu, tatou te malamalama uma, o le tau faasoaso. Ioe. O le tau faasoaso. A o le fesili pe a tatou talanoa i faiga faavae i lou lea taofi i mea tau infrastructure, pe fia le pasene e vaai i ai se faigamalo e tataua ona invest i le mea lea. Ia atonu e eseese foi tali mai lea taimi ma lea taimi. Ma o le mea lava lenei e mafaufau i ai, pe faapefea ona faaaoga le avanoa lea, o sui usufono o le atunuu e afifio mai e aumai le tofa ma le faautaga e fau ai le tatou faigamalo.

Ia, i te i ua umi tele sau Afioga i le Fofoga Fetalai, e tasi lau Matagaluega lea e aumai i le Tala o le Tupe Faaopoopo, o le Matagaluega lea o le Va i Fafo. Ia atonu o lea lava o lo o manino o le faatauga o aseta, o le faaopoopoina o tagata faigaluega ma le tele lava o taimi e aumai ai i le tatou Tala o le Tupe, ia o le totogiina o le tiute o le VAGST. Ae ua ou maua ma faamauiina le fautuaga a le Komiti o lo o fautuina ai le Matagaluega o le Va i Fafo, i le tulaga lava lea o le latou foi galuega i le puipuiga o le atunuu, aemaise i le va ma tatou paaga ma le fesoasoani mai ia tatou i lenei vaitaimi o le Koviti-19. O lea foi e maua i le faaiuga o le Lipoti po o le amataga foi o le Lipoti a le Komiti o Tupe, o lea o lo o faapea mai, o le tele o le Tala o le Tupe, o le vaai lea i fesoasoani o le puipuiga o le atunuu mai faamai. Ma e taua tele le sao o le Matagaluega lenei i le galulue ma a tatou paaga, aemaise lenei taimi o lo o faapena ona manaomia ai le fesoasoani a tatou paaga mo le tali atu i faafitauli e tulai mai ona o le Koviti-19. E talia ma le faafetai fautuaga ua tuuina mai e le tatou Komiti.

O sau upu puupuu lava lau Afioga i le Fofoga Fetalai ona o lea ou te Sui Minisita i le Matagaluega o Tina ma Tamaitai, ona o lo o toesea le Afioga i le Minisita i le tatou poloketi lava lea o le \$1 miliona. Ou te faafetai atu i le Afioga i le Sui Taitai o le Itu Agai, o la ua tulai mai ma lana pepa e faamalamalama uma ai faafesili sa faapena ona saunoa mai ai sui usufono o lo o fia malamalama pea. Ae tau ina ou faapea atu lau Afioga i le Fofoga Fetalai, o se faiga fou lea, ma o lea e tau amata. E manino le folasaga a le Minisita i le tatou Tala o le Tupe Autu, e faapea foi le lagolagosua a le

Afioga i le Minisita o Tupe, o se taumafaiga lea e tatala atu i tua le tamaoiga e gaosi ai e le atunuu i atinae eseese so tatou manuia. O se faiga fou. O le \$200,000 ona ua tuu puupuu le taimi o le tatou Tala o le Tupe e tapena ai le anofale, e talia ai le momoli atu o lea poloketi po o lea fesoasoani i o tatou itumalo.

Ma o le agaga lava ia o le tatou faigamalo, e taulamua tatou nei, sui usufono o itumalo, ma nisi foi o lo o lagolago i totonu o tatou itumalo, a ia tau lau o le faamoemoe, ina ia ofi mai foi tagata e le masani ai ona fai so latou sao i le faatupuina o le tamaoiga po o le manuia o le tatou atunuu. O ai tatou te tua i ai? Tatou te tua i o tatou tagata, ma e tataua ona tatou tuu atu i o tatou tagata meafaigaluega e mafai foi ona gaosi mai ai e i latou i a latou foi pitolaau. E i ai le aufaigaluega a le Malo, e i ai foi le latou sao, e i ai foi le latou tiute ma le latou matafaioi, a o le atunuu lautele o le isi avanoa lea tatou te tapue mai ai taleni o lo o i ai i tua i o tatou nuu ma o tatou itumalo, e tatou te fau ai so tatou tamaoiga ma so tatou manuia.

Ia, lau Afioga i le Fofoga Fetalai, e pei o si au talatala amata lea, ae o le a faasolo atu i le matou Aiga Kapeneta le talifuaitau i saunoaga i luga o le felafolafoaiga o le tatou Tala Faatatau Faaopoopo o le Tupe Nu.1. Faafetai.

**FOFOGA FETALAI:** Ia, ua faamalo saunoa i lau Afioga i le Palemia, o le Taitai foi o lo tatou Malo. Atonu o lea ua faafofoga ma le totoa ma le manino le mamalu o le Palemene i le folasia foi o le finagalo o lau Afioga i le Taitai o le atunuu ma le Taitai o le Malo. Ou te talitonu foi o lea ua talia i le faafogafoga mai a le Palemene, aemaise lava tulaga ia o saunoaga i faiga faavae e tusa ma tiute o le tatou Palemene. Malo faafetai malo foi le faasoa. O lea foi ua fesoasoani aemaise foi o Komiti mo le agai i luma o le tatou Palemene. O lea foi ua oo au saunoaga e tusa o fautuaga a le Komiti, e gata i le Matagaluega a le Palemia ma le Va i Fafu, a o lea foi ua faapena i le Matagaluega o Tina ma Tamaitai o lo o toesea le Afioga i le Minisita. Malo sausaunoa.

Ou te talitonu o lea ua faagasolo pei ona saunoa le Afioga i le Palemia, a outou Afioga i Minisita. Ia, tulai mai lau Afioga i le Minisita mo Faatoaga ma Faigafaiva.

**Susuga Hon LAAULI LEUATEA POLATAIVAO FOSI (Minisita mo Faatoaga ma Faigafaiva):** Ou te tulai ma le ava ma le faaaloalo tele i lenei itula o le taeao na liugalua. O le a i ai se taimi ona saunoa lea o le Afioga i le Sui Palemia o lo o sootuli ma le Tamaitai Palemia. Ou te manatu o lea ua tafa ata o le tauafiafi, ma ua faliu foi le la i lona nofoaga, sa tatou tauavamea mai ai le tatou fonotaga lenei mai le la vaiaso, seia tatou taunuu ina tatou toalia ona o le tatou feagai ai ma le faalavelave. O lea ua tatou futiafu e tasi i le alofa ma le agalelei o le Atua ina ua talatala sa o le tatou tapu. Ae i ai le talitonuga lau Afioga i le Fofoga Fetalai, o lea ua maea ona fofola le fala ma

ua tapau foi tia o le tautiaga aua le faleagafulu a lo tatou Maota, aua lo tatou feagai ai ma le lauliuina o le tamaoaiga o Samoa.

E muamua ai ona ou faapoi vagana ma ou faatulou atu i le paia o le tatou Maota Fono i lenei itula o le afiafi i le ee o lau Afioga i le Fofoga Fetalai ma le Palemene o Samoa. O lea foi e afio atu le Afioga i le Tamaitai Palemia, Sui Palemia, Minisita o le Kapeneta, Minisita Lagolago, tainane foi lena tala na atoa ua tatou le faatasi ai ma le Taitai o le Itu Agai, lau Afioga i le Sui Taitai, ma a outou Afioga o sui usufono mamalu o le Palemene, tupu ma ee o faleupolu o tofiga. O lea foi e malutau ee le paia maualuga o Ofisa o Pulega o Matagaluega a le Malo o lo o vae ma lima i ai le tatou galuega i lenei itula o le afiafi.

Ua faamalo fetalai, ua faamalo saunoa, ua faamalo malele i le paia ma le mamalu maualuga o Aiga ma latou Tama, o Tama ma o latou Aiga, le usoga a Tumua ma Pule, Ituau ma Alataua, Aiga i le Tai ma le Vaa o Fonoti. O outou sa ia ma outou faiga le Maota e, o le Maota e tulutuluitao ma ua soo ona taiao, o le Fono Sili a Samoa na tofi tofa mai ai i tatou tatou te omai e fai le tatou sao ia manuvao ma tautua le atunuu. Faamalo faafetai i tuleiga ma saunoaga, mai le la vaiaso seia tatou taunuu mai i lenei aso, o lea ua tali faaiu le Komiti aloaia o Tupe, e momoli mai le latou galuega na faatonuina e le Maota, agai e lufilufi ma lipoi ma vailiili. A uma ona toe aumai lea se i faafofoga le Maota Fono, faafofoga Samoa.

Lau Afioga i le Taitaifono, ia fai ma viiga o le Atua le aso. O upu ia e taimatalii ai le tatou malaga ma le tatou savaliga ma tatou manatua pea le mea lenei, o taimi sili ona pogisa, o taimi ua latalata ona ao. O le tatou savaliga le Palemene e le i faigofie, ua mavae atuvasa o tulaga o feteenaiga, o tatou manatunatuga ma finauga faaupufai o Malo. Ua a nei? O lea ua tatou sao i maaomalie, ua tatou folau i Fagalalele ua maea ona tatou lutia i Puava, tatou toe liliu mai i luma ma tatou tilotilo ma tatou vaavaai, ua mavae taimi o fefulituaaiga, o taimi o le le mautonu ma le tatou taimi foi o finauga. Ona aisea? E eseese uma o tatou manatu faaletagata. Ae a sau loa le taimi o le Atua, o le taimi o le Atua.

Ma e momoli ai le agaga faafetai tele i lau Afioga i le Taitaifono e tusa ai ma lau folasaga manino, e sao le Afioga i le Palemia, e 10 tausaga faatoa ou toe lagona lea o le ituaiga folasaga lenei i le Maota, e molimoli mai ai sailiiliga ma fautuaga, aemaise le tuualalo a Komiti Faa-Palemene nei, o i latou nei o lo o ave i ai le faamoemoega o le tatou Palemene e tou te o e aumai le finagalo o Ofisa Sili o Pulega o Matagaluega ma le atunuu, ia pe faapefea ona fai le Tala o le Tupe. Ia, o lea ua saunoa le Afioga i le Minisita o Tupe e ala i lana folasaga na amata ai le tatou Tala o le Tupe lenei, o lea ua maea ona foi mai le galuega a le Komiti o Tupe, lea ua folasia i le afiafi lenei. Ia o le agaga faafetai lena. Faafetai i la outou Komiti, malo le galulue, malo foi le onosai, o lea e faafogafoga le atunuu po o le a le tatou tali atu, o le a foi le auala e faafoefoe ai mea mo le lumanai.

E momoli le agaga faafetai i a outou Afioga uma lava na saunoa i lenei Matagaluega, ma o lo o ou tautua ai ma le Afioga i le Taitaifono o Tupe, le Afioga ia Vaele Paiaaau Iona ma lenei Matagaluega ua faaigoaina e le tatou Malo, Faatoaga ma Faigafaiva, Suesuega Faasaaienisi ma le tatou Esetete Tausi. O le mau faavae lava a lo tatou atunuu, o faatoaga ma faigafaiva o le ivitu lea o Samoa. O faatoaga ma faigafaiva, na pau lea o le mea e toolima i ai le atunuu ma tapa i ai le atunuu. Ua alu alu le tatou faigamalaga tulai mai foi nisi o atinae ona faapea foi lea o nisi, o nisi nei o atinae o le a tua i ai le atunuu. Peitai o le vaitau lea ua tatou i ai ma o tatou vaavaai mai i le taunuu mai o suiga ma faamai ma mea ia ua tatou taunuu i ai, o lea ua tatou toe foi i le tatou mau faavae, o faatoaga ma faigafaiva o le ivitu lea o si o tatou atunuu. O lea ua tatou feagai nei, sii i luga tau o oloa a papalagi, o i luga tau o vaa e aumai ai oloa a papalagi, taofiofi mai lenei mau faiga e tapu ai mea uma mo le tatou soifua maloloina, ona tatou tilotilo lea ma vaai, ua tatou faalagolago i mea nei tatou te ola ma soifua ai. O le a la le feau lea ua toe momoli mai ia i tatou? Le Maota e o Samoa ma la outou faafofoga, o le a le feau lea ua toe momoli mai? O lo o i o tatou tuamaota lava ma tualaoa mea tatou te ola ai. Ia, ona faafetai lea i a outou tuleiga ma a outou saunoaga, e leai se mea e tasi e le i faamauina. O le agaga faaaloalo i lo outou fautua mai foi ma outou apoapoi mai i tulaga o faatoaga ma faigafaiva, o lea ua outou silasila i le taimi lenei i le faaletonu o le tamaoaiga o le lalolagi atoa ma le tatou feagai ma faafitauli, o ai lea tatou te toe tua i ai? E tatou te toe tua lava tatou ia tatou.

O lea ua tatou vaai nei, sii le tau o le moa, 70, 80 container moa sa tatou taumamafa ai i lenei fia tausaga, sii i luga le tau o le araisa, o lea ua avea ma a tatou anava taumafa. Sii i luga le tau o le falaoamata, ua fai ma o tatou mausa le taumafa o falaoa ma isi mea. O le a la le tali mo tatou e maua ai le faamama avega mo le atunuu? Le paia e o le Palemene ma lau Afioga i le Fofoga Fetalai, o lea e i o tatou lima le tali, o le tatou toe foi lava e fai mea sa tatou masani ai. Ma e le tau faamatalaina o lena e i outou aao, tatou o i tau o meaaano, o lena e tou te silafia, e leai se mea o lea e i Samoa nei, ufi, talo, manioka, popo, avoka, fualaa taumafa mata, so o se mea lea e i totonu o le atunuu. E o oi meataumafa, laumoli, ti, moegalo, so o se mea, lea e maua i itumalo lea foi e maua i totonu o le atunuu.

Tatou taunuu mai i tulaga tau mealelei, ia aua o le mea lena, o le sami, o le sami a le Atua ma o lo o i ai pea le faamanuiaga mo i tatou, tatou te o ai e fagogota, e leai se tatou mea e tasi o faia i le sami, seivagana ai tatou pole o lea e tuu i tai e faalalata mai ai ia tatou te o e pue mai, atoa ai ma tatou faafailelega faisua, faafailelega limu, faafailelega aliao, lea ua tatou agai i ai i le taimi lenei. O lona uiga, o lea e i o tatou aao lava le tali o le tatou viga tatou te taumamafa i le pusamoa lea sa tatou amata mai e le i faia le Koviti-19 sa \$30 a o lea ua \$80. O le pusamamoe sa tatou talanoa i le \$100 ua \$400. Ia, a o le lagona ma le manatu i lau Afioga i le Fofoga Fetalai, o timaiga ia



e aumai i fautuaga ma tuleiga sa saunoa mai sui usufono, e sao outou, e leai lava se mea e tasi e sese. O le ala lena o le naunau o le tatou faigamalo e tatou te agai e faamapue tulaga ina ia mau pea lo tatou atunuu. Lea ua faasolosolo atu tatou polokalame pei ona taua mai foi e nisi o sui usufono e ala i a tatou taumafaiga o lafumanu fafaga, o tatou povi, o tatou mamoe, o tatou moa. O mea uma na o lea ua amata ona faatulaga atu e ala i le tatou polokalame lea o le SAFPROM foi lea sa fesiligia, o se polokalame sa amataina mai foi i le SACEP i futia ua sola ma aso ua alu, ma o le faamanuiaga papatauave pea lea mo le tatou nuu, sa fesiligia e nisi. E 3,252 i latou na talosaga, peitai na o le 2,260 i latou na faamanuiaina. E 1,325 mai Upolu ae 992 i latou mai Salafai, ma o lo o faaauau pea ia tulaga mo le faaleleia atili o tulaga tau faatoaga i totonu o le tatou atunuu, e aafia ai faigafaiva, aafia ai ma mea fafaga, aafia ai ma a tatou meataumafa.

O le ala foi lea o le tulai, o lea foi sa fesiligia tulaga o la tatou oloa auina atu i fafo, ioe. O le \$200,000 lea e taua i le tatou Tala o le Tupe na vavae mai i le tinoitupe e \$500,000 sa faaagaaga mo faaaliga a le aufaifaatoaga, o la ua ave e gaosi ai le fale e pack uma ai tatou oloa mai Savaii. O le taimi lenei i Savaii, o la e fai i lalo o le pulu tele la e i o, e leai se fale o fai ai i totonu le tapenaga o oloa e auina atu i fafo mo Salafai. O i i le tatou Atele Centre, la ua i ai uma, ua i ai palaka e 10+ tatoso i ai container ma sulu ma le aufaigaluega, a o Salafai, e leai se mea le paia o lau Afioga i le Fofoga Fetalai. O le ala lea ua to ai le tinoitupe lea e \$200,000 mai le tatou Tala o le Tupe lea e taua nei e ave e fai ai le packing house mo Savaii. Leaga foi a sau le loli popo mai Savaii e oo mai i inei ua taei uma popo i le la. E toe fafao atu popo ua 20% ua aveese. A sau le uta ulu mai Savaii e oo mai i inei ua pepe uma ulu. E faapena le fetuunaiga. Ae a fai lava le packing house ia i Savaii ma atoa ai mea lelei uma mo Savaii, ona leai lea o se faapopoleina mo le aufaifaatoaga.

O le taimi lenei, o la ua ave le tatou esi, ua sali le esi, sa le mafai ona ave le mea lena. Ua sali le esi felesi, tuu tagapepa maua le tai 2 tai 3 tai 4 kilo, la ua ave i o tatou aiga, e faapena foi i le niu sa le mafai, sali le aano ave ma le sua la e fai ai vaisalo ma taumamafa faapapa ma mea uma a le tatou atunuu i atunuu mamao, sa le mafai ona tatou maua.

O le tulaga tau talomua, o lea ua fai atu le tautalaga a le tatou Matagaluega. O le \$500,000 lea sa faaagaaga i tausaga uma lava a le Matagaluega e fai ai le faaaliga a le aufaifaatoaga, ua manatu le faigamalo, fai se suiga. E uma ane le \$500,000 lea, masalo pe na o se \$100,000 lava e alu i le aufaifaatoaga, ae alu uma lava le tupe lea i le tapenaga e fai. Ma e le malolo le Matagaluega e 5 i le 6 masina o feoai le Matagaluega e tapena le agriculture show lea sa masani ona fai, e fai uma tauvaga laiti i lea itumalo ma lea itumalo, ona faatoa aumai loa lea tuufaatasi i le tauvaga tele lea e fai mai i Apia, ma faapena ma le tauvaga lea sa fai i Salelologa.

Ua fefulisai le tofa i le Kapeneta, le Afioga i le Tamaitai Palemia ma le Kapeneta, fai se suiga. O le \$500,000 lea, ua tatau ona tatou liliu loa, lafo le avega agai i le atunuu, e tapena e latou le latou faaaliga faifaatoaga i totonu o lea itumalo ma lea itumalo, ae avatu le tupe lea, vaevae sao ai lava mo le itumalo latou ia, ae aua le ne i toe alu tele le tupe lea sa tapena i le tele o faasalalauga, tele o tapenaga, o le mau pa uaea, o le mau faleie, o le tele ma le anoanoai o le taimi o le Matagaluega e alu ai a ua le faia galuega a le Matagaluega. A ua manatu, e sili pe a faaagaaga loa le seleni lea, e agai sao lava, a faapea o le faataitaiga lava foi lea, tasi le vaiaso pe lua vaiaso ua soo Samoa atoa. Pe faapea foi o le a tasi le itumalo tasi le aso. E mafai ona tasi le aso ae lua, tolu itumalo e fai talomua, ae faasolo le Matagaluega, o e asiasi ma tapena ma ave le fesoasoani i totonu o Matagaluega eseese ina ia tali le mea lea, e leai se isi o tuulafoaiina o le aufaifaatoaga. Every farmer will display their products. A o le isi mea lea sa i ai, e i ai le tagata e tafao tafao i le taulaga sau faatau mea i le maketi alu asiasi. Ona maua ai lea i totonu ma le faakegikegi, ua uma ane ua le alu le manuia i le tagata la e sa tigaina, ae le maua. Ae a faapea la e fai i Fagaloa le faaaliga, e leai se faifaatoaga Fagaloa e le alu ifo, aua foi o lea o le a alu ifo lava le tagata ia ma ana mea e faaali o a uma ana mea, o talo, fai, taamu, popo, o mea faapena.

A o le agaga lena lau Afioga i le Fofoga Fetalai ua manatu ai le faigamalo, se i tatou fai se suiga lelei, suiga mautu ma suiga mo le atinae o le atunuu. A o le itu sili la i le mea lea lau Afioga i le Fofoga Fetalai, o le taimi e taupule ai le faaaliga lea, ae mulimuli atu ai i i ma le au faatauoloa, le au exporters ia e ave a oloa i fafo. O le taimi lea e faaali oloa a o la e ua o atu ma le au exporters ia faatau ai lava ma oloa ma avatu ai lava pe a finagalo ai le itumalo, o le latou mea lea e fai. Ia, e eseese lava tu ma aga a itumalo, leaga o le isi itumalo a tau loa le talomua e le faataua e tufa ma le nuu. Ia o le a ou le aiaina le mea lena, ae na ona ou faamanatu atu i le faafofoga mai a lo tatou atunuu, o le faiga fou lena o lea o le a tatou i ai nei. E pasi le \$500,000 lea mo le faaaliga a le Ofisa o Faatoaga ua tea mamao le taimi sa tatau ona fai ai le faaaliga, ona e pasi le tatou Tala o le Tupe ua mamao mai i luma, ua uma le taimi o le faaaliga, ia ona toe talosaga ai loa lea i le Kapeneta, e aumai le \$200,000 lea e ave e fai ai le packing house. Ave le \$120,000 e ave e fai ai le transformer o le tatou feed meal lea e gaosi ai meaai a manu atoa ai foi ma mea e faaleleia ai le tulaga o le poloketi lea, le SACEP lea a Saina e faasolo i le taimi lenai, ae faatotoe le \$180,000 o lea e i ai i le taimi lenai lau Afioga i le Fofoga Fetalai, ia o lea la e faasolosolo ai tatou talomua. O ai lava le itumalo o toe fia fai se talomua, o lo o tatala le avanoa. O lea na fai le talomua a Aleipata Itupa i Lalo, fai le talomua a Faleata i i i Vaimoso, fai le talomua a Faasaleleaga 3, fai le talomua a lou itumalo. O le faasoa la lena lau Afioga i le Fofoga Fetalai, o lea e faagaaga i ai le tinoitupe lea e taua i lalo o le tatou Tala o le Tupe e \$320,000.

Lau Afioga i le Fofoga Fetalai, o lo o i ai nisi o faafitauli pei sa ou taua, saunoa foi le sui usufono o le Vaa o Fonoti, ia e sao lava oe, e sao lava oe. Atonu e i ai foi tatou itumalo e le tofu maumaga uma ae i ai le mea e te lelei ai. Ia se i ta talanoa lelei po o le a le auala e fai ai lau avamua lea e te saunoa i ai aua e manatu foi e le na o le itumalo, o la e foi e i ai itumalo o Savaii i Salega. Ia o latou foi lena, pe faaagaaga faapea e talomua isi ae avamua isi. A o le mea e taoto i ai le tulaga lelei mo le faaauauina, ou te taofi o le mea lena e fai.

O tulaga tau faigafaiva lau Afioga i le Fofoga Fetalai, ua taua foi e nisi o sui usufono faafitauli i nisi foi o mea e le manaomia, e i ai le mea lea o le alamea, lea sa taua e le saunoaga a le sui usufono mamalu mai Safata. Ioe. O lo o faasolosolo pea taualumaga ona o le lamatia foi o nisi foi o tulaga tatou te le manaomia ona o faamoemoega. A o le tatalo, ia outou logo pea le tatou Matagaluega. O le tatalo lena a au nei o le Minisita. A i ai ni mea ua outou silafia e le talafeagai, faamolemole, logo le tatou Matagaluega. E le natia, o lea sa outou silasila i le isi taimi talu ai nei lava i le mea lenei o le o o tagata e ao fugafuga faasolitulafono, soli le tulafono. Ia, o le tatalo lena, a o le mea ia a tatou iloa le mea e le tatau ona faia. Ae ua taua e le sui usufono mamalu ona o tulaga o le lamatia o le tatou siosiomaga i tulaga tau fagota, ua manatu ai o le tatou galuega faifaatasi.

O le tulaga o le tatou fale lea e taua i Otahuhu, o lea ua amata ona tapena le faamoemoe, faatulaga faatasi ma le tatou Export Authority lea ua tapena. O le faamoemoe o le tatou Malo ia faatulai le mea lea o le Export and Import Authority e taula uma i ai mea e auina atu a le Malo i fafo. O le taimi lenei, o lea e sue lava le mea e ola ai le exporter ia, lau ana oloa ma ave ana faamoemoega ma taumafai e saili maketi ma saili le alafua e faigofie ai ona fai mea i fafo. A o le faatulai o le Matagaluega fou lenei a lo tatou Malo, e matua fesoasoani uma mo i latou mo le auina atu o tatou oloa mo atunuu mamao, Amerika, Hawaii, Niu Sila, Ausetalia, Tutuila, po o fea lava le tafa o le lalolagi o lo o alaala ma papaaao ai o tatou tagata, ia o le faamoemoega lena, ae taula la i i le fale fou lea ua fai nei i Niu Sila. E pei o le taimi lenei a avatu a tatou oloa i Niu Sila, e sue lava le mea e alu le tagata ia e devan ai ana container ma tau kilia mai i tua. A o i, o le a matua mataitu lelei mo le faataunuina uma o a tatou oloa ma faasolo ai polokalame mo tatou oloa auina atu i fafo.

O le tatou SROS, lea foi sa fesili mai nisi pe le mafai ona fai se tatou mea lea o le faaumi o le soifuaga o mea uma. O le faamoemoega lena o le tatou fale suesue. E le o mapu le suesuega a le tatou fale suesue lenei, o se faamoemoe lelei foi na amatamea ai foi le faigamalo na uma nei, o le sailiilia lea o suesuega e le mapu. O le mea mulimuli lea na fai nei, o le tatou suesuega o tatou laulaau e maua mai ai nisi o fesoasoani mo mea lea tatou te vaai o lea e tutupu i le taimi lenei. Ma o ai na iloa pe maua atu i Samoa le fofu o le Koviti-19? A o lea lava e taumafai pea le aufaigaluega. Ou te

molimau atu i le tamaoiga o le tomai ma le iloa o lo o i ai i le tatou Matagaluega lenei. O alo ma tama fanau uma a le atunuu ua foi mai fafo. Ma e lagona lava lou agaga faagaetia i lou alu ese mai le Matagaluega lenei i le 2017, ou te foi mai, ua tele le siitiaga taua. E pei ona ou fai atu foi i le isi au lauga, na ou agai foi i le suega o lou DNA, po o oe o se suli moni o le suafa, faasolo uma i ai tulaga na o lo o fai foi ma tau vevesi ai le tatou atunuu i mea o tagata o tau sue le piitaga ae tau o i gafa o isi aiga. A o le mea sili ma le taua, ia aoga suesuega nei mo le faamoemoe o le tatou atunuu.

Ia, e le natia foi, o lea e faafofoga mai le Afioga i le Palemia ma le Afioga i le Minisita o le Soifua Maloloina, ua faatonuina e le Palemia le tatou SROS e fesoasoani i tatou test o le Koviti-19. Ma o se mea lelei lena mo le faasologa o le agai i luma. Ia, ua vevesi vevesi i le tau ave o tatou test e fai i Niu Sila ma tau fesiligia foi tatou tests e fai i isi taimi, a o la e i ai le tatou fale suesue. O le agaga lea o le tatou Malo ia feulufai, fesilafai, fetaliai, galulue faatasi ina ia maua nisi tali lelei se tele, o lea ua amata nei ona matou talanoa lelei i le Aso Toonai na uma nei, ia, o lea lafo le avega i le Afioga i le Ofisa Sili o Pulega o le Matagaluega o le Soifua Maloloina ma le Ofisa Sili Dr. Seuseu o le SROS, e o ifo e vaai po o le a le auala e galulue faatasi ai i le suesuega o le tatou Koviti-19.

Ia, masalo pau ia o nai mataupu lau Afioga i le Fofoga Fetalai sa ou manatu e tolaulauina atu i le tatou Palemene i lenei afiafi, ma nai nisi o faafitauli lea sa taua e sui usufono mamalu.

**FOFOGA FETALAI:** Ou te iloa lau Afioga i le Minisita o lo o i ai le sui usufono o lo o fia sausaunoa. Ou te vaelupeina lau saunoaga. Ia, tulai mai lau Afioga i le sui usufono mamalu mai Falelatai ma Samatau.

**Afioga Lupematasila Galumalemana Tologata Togia Tile Leia (Falelatai ma Samatau):** Faafetai i lau Afioga i le Fofoga Fetalai mo le avanoa. E leai se agaga e fia faalavelave i le saunoaga matagofie a le Afioga i le Minisita, o lea foi ua tau faaiuiu. Ae leaga o lea sa ou taua se tatou Tulafono foi lea e test ai tatou i mea ia o drugs, a o lea ua oo sao lava le Afioga i le Minisita i le tatou Faalapotopotoga lea o le SROS.

E pei ona ou taua, i le taimi a o avea au ma Ofisa Sili o le Faalapotopotoga o le EPC, sa ou taumafai ai i se Tulafono faapea. Sa fesootai foi la i le tatou Faalapotopotoga o le SROS, pe mafai ona latou faatinoina le test lea aua e le taugofie e pei ona saunoa le Afioga i le Minisita. A o lea la ua oo tonu lava i ai le saunoaga a le Minisita, ia, o se tuualalo ma avatu foi se fautuaga, ona o le faamatalaga sa aumai i le SROS i le taimi lena, e mafai ona latou faia, a o le faalavelave, e le o i ai se manaoga o faaali atu e le Malo e mafai ai ona latou certify ina tatou saienisi ia e i le SROS ona mafai loa lea ona faatino le vaega lea. Ae pei o sau tuualalo lena ma se faamanatu, meamanu o lea ua i i le Afioga i le Minisita. Faafetai.

**FOFOGA FETALAI:** Ia, faafetai o lea ua maua lou finagalo. Ia, lau Afioga i le Minisita.

**Afioga Fuaava Suluimalo Amataga (Aleipata Itupa i Luga):** Lau Afioga i le Fofoga Fetalai mo le faasaoina o le taimi o le Afioga i le Minisita.

**FOFOGA FETALAI:** Ia, saunoa mai lau Afioga i le sui usufono mamalu mai Aleipata Itupa i Luga.

**Afioga Fuaava Suluimalo Amataga:** Faafetai lava i lau Afioga mo le avanoa. Ia, ona o lea ua matau atu foi ua tau faaiuiu le saunoaga a le Afioga i le Minisita, faafetai tele mo le tulaga foi o le mataupu sa laga o lea ua agai i ai le saunoaga aemaise foi o le tele o fuafuaga ma polokalame matagofie o lea ua saunoa i ai le Afioga i le Minisita. Ae pau lava lea o si mea lea leaga o lea e saunoa faamaumau uma tulaga ia, aemaise lava le tulaga lea o lea foi ua oo le saunoaga i le SROS, ae toe faamanatu atu le tulaga foi lele sa laga i se matou tautalaga, atonu o se tulaga lea e ono aafia ai foi le tatou talo, i le tulaga lea o le tele o le vailaau faaoga e ono aafia ai le tatou palapala. A fana lava i le tele o tausaga, e i ai lava le taimi e ono oona ai, a o lea sa tatalo i ai foi lea i le Komiti lea o lo o nafa ma vailaau e aumai i totonu o le atunuu, ou te iloa e i ai le Matagaluega o le Siosiomaga, Matagaluega o Faatoaga ma le SROS, ia ma nisi foi o Matagaluega e lauilii le tulaga lea ma ni suesuega e fuafua i ai po o le a le ituaiga vailaau talafeagai, a o le a foi le concentration foi lele, aua e eseese lava le faifaatoaga ma lana sui. O lea sa taua o le isi o le momono, a o le isi e le iloa po o le fagu atoa.

Ia, o tualga ia ina ne i te i ua alu alu ae faalautoafaina le tele o le tatou eleele i se taimi o i luma. Ma le agaga faaloalo faafetai.

**FOFOGA FETALAI:** Faafetai o lea ua maua lou finagalo.

**Afioga Hon Lautafi Fio Selafi Purcell:** Lau Afioga i le Fofoga Fetalai, e fia faasao le taimi o si ou uso a Minisita.

**FOFOGA FETALAI:** Ia, saunoa mai le sui usufono mo Satupaitea.

**Afioga Hon Lautafi Fio Selafi Purcell:** Sa pai foi lava le lauga i le Afioga i le Minisita. Ona o lea ua tau faalogo atu ua tau see le folasaga a le Minisita mai le vaega lea o le Feed Mill. Sa ou faamalo i le Afioga i le Minisita ona o le toe asiiasi i le atinae lea ou te iloa foi e au o se atinae taua tele. Ae na fai muamua foi i Samoa le mea lenei o le Feed Mill, atonu e le o o oi le tulaga o lea e manatu le Afioga i le Minisita ma le faigamalo tatou te oo i ai. I le taimi muamua, e pei o le mea lava na alu alu ai foi le taunuu le faamoemoe, o le sustainability, sustainability o le supply o le raw materials, foi lele, o a

mea e faaoga i totonu o Feed Mill nei, o lava le supply. Na i ai foi tagata na o fai latou toga manioka i le amataga, na manaia lava. Ia na alu alu foi e i ai foi faafitauli, ua tele ina ai e isumu. E o atu la e ao mai ia raw materials lea e fai ai, ia ua leai se... ia sau foi le tau o le popo ia, ia ua o tagata faatau le popo foi lea faatau ma le sua, ae ua le faatau mai i i le tatou Feed Mill. Ia, ou te le iloa la i le Afioga i le Minisita po ua i ai se incentive foi lea e ave ia i latou nei ina ia mautinoa e toaaga lava latou, ia i ai pea le supply. Ia ma le isi foi mea, ia po o lava i latou e demand, o le a faaogaina le Feed Mill, po o a meaituaolo, po o moa, puua, tulaga faapena, po o lava le interest ina ia meet e le supply le demand and demand and supply.

Ia, ma o le faafesili atu lena i lau Afioga. Faafetai.

**FOFOGA FETALAI:** Malo faafetai. Ia, ou te iloa leaga o lea ua tatou taunuu i le tatou taimi malolo o le tatou malologa. Ou te iloa o le a tali atu le Afioga i le Minisita pe a tatou talii mai i le tatou malologa.

E faataaiaese Galuega a le Fono Aoa mo lana malologa.

*Na faataaiaese Taulumaga a le Fono Aoa Faitulafono mo lana malologa masani i le itula e 7:47 i le po ma toe faaauau i le itula e 8:18 i le po.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoa Faitulafono.

I le toe amatalia ai o tatou Taulumaga, e i ai le manatu ua sao i alo le tautega i lena afiafi i le paia o le Palemene. Ua faamalo le onosai.

E faataaiaese tatou Taulumaga mo le tatou malologa o lo o tau tulai mai ia le sui usufono mo Sagaga Nu.2 mo se mataupu sa laga i lana saunoaga, e fia maua ai se tali mai i le Minisita o Faatoaga ma Faigafaiva.

Ia ou te tapa lau afioga i le sui usufono mamalu Sagaga Nu.2.

**Susuga Maulolo Tavita Aмоса (Sagaga 3):** Faafetai i lau afioga i le Fofoga Fetalai mo le avanoa. E le sese lava upu a le atunuu e faaosofia moegaluga i lagona ituaso e folasia ai se faamoemoe taua aemaise le folasaga manino a lau afioga i le Minisita o Faatoaga ma Faigafaiva. E le tauisoina foi le moni o le saunoaga o le Matagaluega lea e tua i ai Samoa i lona soifua laulelei ma le soifua lalelei.

Lau afioga i le Minisita, semeamanu lava e le i see ese lau afioga, sa taua ai faapea le tele o le tamaoiga ma le fesoasoani e maua mai i le gataifale ae e le o malosi le tatou faaogaina. Ia e pei o le vailiu lea lau afioga e toe faamanatu atu lava, ona o le tasi lea vaega sa aafia i lau folasaga mua foi i lena vaiaso. A silasila foi lau afioga e tasi lava le maketi i Upolu atoa nei, e

na o Apia le maketi o ia. O lea sa ou taua, a i ai ma se maketi o ia i lo matou itumalo e mafai ona tau fai o atu uma i ai ia lea vaega ia o Tuamasaga ia faapena foi i Aana.

A lea la ua vaavaai atu i tapu ia ua aumai, ia aua lava le puipuiga o le soifua maloloina, ia ua faatapulaa foi ia le tulaga mo i latou e faatau ia latou tauia se i tulou i le auala. O le faatinoina o se isi maketi e 2 ai maketi i inei i Upolu, e tasi lea avanoa matagofie agai atu i ai le vaega lea, o le aufaatauia ia ma faapena ona faigofie ona fefaasoai le tatou tamaoaiga aemaise foi la ia se incentive, o se tulaga lelei lea e i ai foi ia le aufaifaiva mo lea foi faaogaina o le tamaoaiga mai i le tatou gataifale.

O le isi mataupu lau afioga, ia e moni lava au, i tulaga o fua o faaeleeleaga, ae ona sa ou taua foi i lau folasaga e tasi lenei o itumalo e fiafia i faatoaga ia o fualaau aina. Ae o se tasi auala ua ou vaai i ai, a mafai ona fesoasoani ane lau afioga pe o fea tonu e lavea ai le vaega lea e uunaia ia le \$200,000 atonu e faasaoina mai sina vaegatupe mai i lenei vaegatupe e fesoasoani ai i tulaga la ia o tatou fualaau aina. Ia ona o la ua i ai ia le matou maketi, ia ua tele le manaomia e tagata, ia ae ua tau le lava ia le supply.

Ia e pei o nai manatu ia e tuu atu i tafatafa o lau afioga, ia ae faafetai tele lava mo le folasaga ia e faatupu manatu i lenei afiafi. Faafetai i lau afioga i le Fofoga Fetalai.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai...

**FOFOGA FETALAI:** Ia mo le faasaoina o le taimi o le Minisita... saunoa mai lau afioga i le Sui Taitai o le Itu Agai.

**Tofa Hon Lauofo Fonotoe Nuafesili Pierre Lauofo:** Ioe, o se mataupu taua lava sa lagona, se manatu foi o lenei itumalo. O le mataupu lea ua maua atu i le saunoaga a le Afioga i le Minisita, o le mea foi la lea e test ai le pe ua maua pe ua aafia le tagata i le Koviti-19, ona o lea sa ou taua foi ona e tele tagata o lo o fesilisili.

Pe e i ai ni nofoaga foi lea faapitoa e o i ai e fai test ia ina ia mautinoa e le o i ai se community transmission. E le o i ai se mea foi lea o salalau i totonu o le atunuu, ae o le taimi nei pei e foliga mai e tatou te le o oo i se tulaga o faapena, ae e pei o lea e maua atu o lea ua saunoa mai le afioga i le Minisita i tapenapenaga. Ia o lea la ua galulue ai ia le tatou faalapotopotoga o le SROS, ia malo faafetai. E talitonu foi o se galuega taua tele lenei galuega aemaise lava ia le vaitaimi lenei o le faamai.

Afai foi ae maua le test foi lea e mafai lava ona faatino i le fale o le tagata lava ia, ia e matua sili atu ona lelei lenei. Ia aua e pei o lea foi e matau atu foi i isi atunuu, pei e i ai lava ia nofoaga foi ia e o i ai. Ae a mafai lava ona fai

sau test foi lea, ia ona iloa lava lea ma silafia e le tagata ia le tulaga pe ua aafia e le faamai pe leai.

Ia ae a faapea foi e a foi e mafai ona faatino pe maua i se tulaga foi lea e maua fua e leai se totogi, ia aua o le faamai e fai si ogaoga e pei ona silafia. E afai foi la e maua i se tulaga e maua fua, ia ua sili foi lena ona lelei ona o le puipuiga lava o le soifua maloloina. Ia e pei o le tulaga lea ua ou toe tulai atu ai faafetai i lau afioga i le Minisita.

**FOFOGA FETALAI:** Ia malo faafetai, tulai mai lau afioga i le Minisita o Faatoaga.

**Susuga Hon LAAULI LEUATEA POLATAIVAO FOSI:** Ia faafetai, manatu o lea ua matu i fau le taliga o le sua i le tatou Maota ma e momoli atu le faafetai tele i lau afioga i le Fofoga o le Fono aemaise foi lau afioga i le Failautusi ma le tapenaga o le tatou malu afiafi.

Na ou alu atu ou fesili i tua, o fea e sau ai le pizza lea e tali ai le tatou sua i le afiafi? Ae saunoa mai le tatou augasese, o le pizza a le afioga i le sui usufono ia Georgie. Ia faatoa ou toe tofo foi lea i le pizza a Georgie. Ia faafetai lava o lo o tumau pea le lelei o le tapenaga, faafetai i si ou faletua ma le nofoaalo aua e le o toe fai pizza oe.

O lau tuualalo ou te manao e te alu i uta ia Seuseu, e aumai le taga falaoamata ulu ou te manao e te tago e fai ai ni test ona aumai lea e taumamafa ai le tatou Palemene. O lena lava e tumau ia le faafoeina lelei o si au pisinisi ma le taumafaiga. E pei lava ona fai atu Mauu e le tau selu atu. You are a self-made man. E te tagi lava i ou lima ma e galue i le ao ma le po lea e faamanuia ai le Atua ia te oe. E pau lava lea o lau tuualalo, faaoga ia tatou mea Samoa e gaosi ai lau pizza. Ioe o lau lea tuualalo.

O le tulaga lea sa saunoa i ai...

**Tofa Mauu Siasia Puepuemai (Vaa o Fonoti):** Lau afioga i le Fofoga Fetalai pe maua se avanoa faamolemole...

**FOFOGA FETALAI:** Ia leaga o lea ua taua le suafa o le sui usufono mamalu mai i Fagaloa, ia le Vaa o Fonoti. Saunoa mai lau afioga i le sui usufono mamalu.

**Tofa Mauu Siasia Puepuemai:** Ia e le faalavelave i le saunoaga matagofie a le afioga i le Minisita, maua foi si vaega e tulai atu ai i le ava tele ma le faaaloalo, ia lau amata mai o lea ua... faamalulu atu o lea ua toe logo mai pe o lava pea ia le pizza ia o lea e faafogafoga mai si ou itumalo ia o lea ua taua e le afioga i le Minisita, ia atonu e i ai se taimi ona ma feiloai lea i le tulaga foi lea i le tatou avamua.



Ae ua aoga foi lea ua text mai nei se tasi o tamalii o lou itumalo, pe maua sina vaegatupe foi lea pe \$6,000 e avatu e tau tapenapena ai foi lea le avamua, ia oo i le taimi e faatino ai, ia e le toe manaomia se seleni ae faatino lava le faamoemoe. Ia lua lea ua saunoa manino ia le afioga i le Minisita i le tulaga o le falaoamata lea o le ulu, ia faafetai o lea ua matauina, ia o lea ua agai le tatou Malo e tapena ia le vaega ia o mea lava e maua i o tatou laufanua.

O le tulaga e pito sili lea ona taua aemaise o se faalogologo, ia aua e tau fai foi sina taugata o le falaoamata. E i ai foi taimi aua e oo i lea masina ua i lalo ia le tau o le falaoamata, ae i ai foi le taimi ua sau ua oo i luga.

Ia ae o le tau lava o le pizza o la e taugofie ona o au e alofa tele i tagata o le atunuu. Ia ae peitai la, ia o lea la ua matauina, o lea la ua maua e le vaega lea a tatou i uta i le SROS. O le mea lea e talitonu o la e faafogafoga mai ia le afioga i le Pule Sili o le SROS, ia a mea e le aumai loa ni taga se 10 se i faataitai ai ia aumai fua, aua e lelei foi ona aua e i ai foi nai au metotia e mafai lau afioga i le Fofoga Fetalai, e mafai ona ou faia i se taga falaoamata muamua a ou tago e tofo atu foi lea ou te vaai atu e i ai nisi tulaga e manaomia, ia o le a tatou fesootai lava. Ia ae manaia lava le aumai o le 10 ona faataitai mai lea i le tatou Palemene, ia ma le faaaloalo lava.

**FOFOGA FETALAI:** Ia tulai mai lau afioga i le Minisita o Faatoaga.

**Susuga Hon LAAULI LEUATEA POLATAIVAO FOSI:** Ia malo faafetai. O lea ua maua mai e le sui usufono mamalu le auga o le fautua atu o le tuualalo, Georgie, o lene e i ina le tofa. O oe o lo o i ai uma le recipe na taumamafa uma ai le atunuu i nei tausaga e tele. E fiafia i ai le atunuu, ae ou te vaai i ingredients ia e te faaaogaina, o le sisi, o le olive, o le bacon, o mea uma mai i fafo.

Ae ou te fautua atu, faaoga ia tatou... e manaia pe a fai sau pizza foi lea e tau o le luau pizza, po o le faalifu pizza. Ia pe o le faiai pizza. Ae na ona faapena atu, na ona faapena atu e na ona faatupu manatu. Ae o le amata atoa o le pastry atoa o le pizza, o lea ua e faafogafoga atu o lea ua ou faatonuina Seuseu, afio i uta e aumai se taga falaoamata se tasi. Ioe ia ona amata ai laia, ioe ne i mea ane ua aumai uma ona faaleaoga te i ua fai pe, ne i te i ua sese lau tala pe work pe le work ae e leai se masalosalo. Ou te talitonu e...o la ua i uta ia Seuseu ma le tatou SROS. O le falaoamata e gaosi mai i le ulu, o le falaoamata e gaosi i le fai ma le talo, ma le manioka.

Ia ua outou silasila la outou i ai i le tele o mea ia ua mafai ona maua e tatou e faagaioia ia tatou meataumafa, e pei ona ou fai atu, e 20+ i le 30 container i le masina. O lea e tatou te ai falaoa ma tatou ai pani ma o tatou ai masi saina ma tatou kekesaina, aua o mea uma ia e tatou te taumamafa ai i le taimi lenei. Ia ma o tatou taumafa pizza ai foi i falaoamata lea e aumai mai i fafo.

Ae o le tuualalo i lau afioga, e faafetai mo le taliga o le sua o le tatou Palemene.

O le tatou feedmill, ia e sao ia le saunoaga a le afioga ia Lautafi, ia those were the days. Na o tatou o ai e fai ia tatou mea na. E matautia ia le tatou fale feedmill sa fai. Ae o le mea na tupu, ua muamua ia le taavale solofanua, ae mulimuli solofanua. O le mea lena na ala ai ona le mafai e le i taitai tatou oo i lena taimi e lava faatoaga commercialisation a le atunuu e mafai ai ona service le mea lea.

I le taimi lea i le agai mai ua uma ona faatulaga e le Matagaluega e ala i le tatou lafumoaa, e ala ia tatou lafupuaa, e ala ia tatou i'a, e ala ia tatou mamoe, e ala ia tatou povi. O mea uma nei, e fafaga mai i i le feedmill lea. Ae sa le mafai ona faataunuaina i se taimi lelei i lena taimi ia le tatou feedmill, ona e le i taitai ona o tatou oo i le mea e tataua ona o tatou oo i ai i le faatupulaia o le atinae o le lafumanu e tapena ai le mea lea.

Ma o le feedmill lea e fai i le taimi lenei, e fai e le Malo lea e fai i lalo o le polokalame lea o le SACEP. O tatou ma le va ma Saina. O la ua uma ona fai ia le 20 eka manioka. O la ua i uta a outou fia silasila i ai afitio i uta i Nuu, o lo o i ai uma ia le demonstration farm, ma le tapenaga la o le tatou feedmill lea ua fai. E amatamata malie ai ona faataavale ia maua mea ma posiposi agai i puaa la e fafaga ia maua ai ia tatou biogas. A tutupu lelei tino o puaa ma tele tulou lava ma tele a latou feau, o i ina e faatupulaia ai le tele o le kesi lea e tatou te maua mai ai. O le biogas lea e maua mai ai le kesi kuka lea ma le tatou eletise. O la e i uta i le taimi lenei le tatou polokalame lena.

Ae ua manatu le Malo, we believe this is the right time, commercialisation and mechanisation. O le tulaga lena o lea foi ua outou vaai i le agai mai o le tele o faafitauli lea e feagai ma le aufaitilapia. E leai ma se meaai, no food at all, leai ni meaai a ia. O tatou akina tulou atiga e togi i i mea ia e fafaga ai ia.

A o atunuu la e i fafo o Thailand e import mai i Niu Sila le tele o tilapia ona o la e latou te faia lelei. A outou silasila i luga o le You tube, ae savali atu le tagata ma le taga e tatala, e piliona ma miliona ia e omai. Ae pei o le taua lena o le taulagalaga a le afioga ia Lautafi ou te talitonu o le taimi sao lenei ua amataina ai le tatou faamoemoe. O le vaiaso lenei e taunuu mai ai le tamai moa, one day old a Frankie, e taunuu mai nei. O fea e aumai ai? O lea lava tatou te faalagolago e sapolai mai moa mai fafo. O moa na mo layers e aumai e tuufua maua ai tatou fuamoaa. E faafetai ua maua a tatou fuamoaa felesi. O moa sa o tatou ai ai i aso ia, e 6, 7 masina faatoa oo mai le fuamoaa Amerika ma Ausetalia sa o tatou aai ai. Ae faafetai i nei faifaatoaga malolosi o le atunuu, o Frankie ma le afioga ia Taimalie Charlie o laua ia o lo o taulamua i le layers lea tatou te taumamafa ai i fuamoaa. E na ona tuufua nei lava, taumafa taeao.

O le agaga lena e taua ai le mea lenei o le feedmill. Aua o laua uma nei, o la e faatau mai Niu Sila a la meaai. O lea foi ua outou faafofoga i le

faasalalauga lea na ou faia, o la e sua nei le 100 eka i uta i le STEC, o lo o ua faatuina ai le fale fasimoa tele a lea foi tamalii o le atunuu. O le auga lava lea, ina ia uma loa ona tuufua moa ia e fia selau afe, ona aumai loa lea fasi lelei i le fale fasimoa lea, e maua ai tatou moa. O le moa o lea e gaosi i Samoa o lea ua uma ona tuufua, ae ua maua le tino o le moa, aumai loa fai lelei. E leai ni vailaau, leai lava ma nisi mea o tatou masalomia o lea e tupu ai lo tatou masalosalo. O pusamoa ia e aumai, e tatui i vailaau, o ai na iloa? E tatou te le iloa, ae o le auga lena ma faamoemoe.

O lea foi e tapena le tulaga o le isi foi proposal a le isi kamupani, e same proposal. O le agai mai latou te gaosi moa, ina ia fai ai le replacement lea, o le 70 container pusa moa lea tatou te taumamafa ai i le taimi lenei. Ona tupu loa lea o le mea lea e tupu, ua le \$40 le tau o le pusamoa, ae ua \$80 le tau o le pusamoa. O le agaga lena o lea na momoli atu i le faatauaina o le feedmill.

O le saunoaga a le sui usufono mamalu o Aleipata Itupa i Luga, i faalelei eleele, e sao. A le lelei eleele e le lelei le fua o faatoaga ma mea uma. Ae tasi lena mataupu o lea e faatulaga i le taimi lenei, ona e eseese o tatou lagona i le atinaega o faatoaga. O isi e fai mai tatou te o i le mataupu lea e sau o le organic farming. O le organic farming e leai se vailaau leai se mea e tasi, ae o le mea e mafai ona fai, e masalo o le tele o le lapotopoto lea. Aua foi e faigata lona atinaeina o organic farming, e le laititi. E seiloga e te manaomia ni tagata se toatele e faaoga ma e alu la i luga le tau o le mea lena, e alu i luga le tau o oloa o le faatinoga o le mea lena. O lea foi tou te vaai i ai, e le ave le tatou fetau. O le tatou coconut oil ma isi tatou organic products o lea e label i lalo o le tulaga lea e fai ai fefaatauaiga i fafo, certification, organic certification, lea e mafua ai le tulaga o le oloa lena. E ese foi le ituaiga metotia e faatau ai lena oloa.

Ae ua masani i tatou i le tulaga lea, a e manao e fai lau lafo nei, e na o le pipii lava o le fana afi, sui ma kalone e 10 pigi loa, ona faatoa tele lea o se mea e tulai mai e te maua ai se tupe i le tulaga lautele, commercialization, lea tatou te talanoa ai foi i nisi taimi. O nisi foi o taimi lea na tatou talanoa, e faaoga masini. E le o toe mafai i le taimi lenei i se tama talavou o le atunuu, ona toe lalafo le mea lea o le 40 gafa faatafafa e lalafo ma toto. Sa sau ai aso ia, e faakonekarate le mea lena, e \$60, 40 gafa faatafafa, lalafo ma toto.

O le taimi lenei ua le mafai. E leaga aisea? Tatou vaai na ona foi mai lava i le tauapu, tautau ma le earphone i le taliga. Ua fiu e toe fai atu le mea lea o le o i uta, ua le mafai, ua na o le saveu lava o le telefoni le mea lea ua fai. O faafitauli na. A o le fautuaga a le sui, ua ou taofia. E pau lava lea, tatou te fetuutuunai pea leaga o lea na lavea ai isi atunuu, na lavea ai Fiti i le overuse o le eleele. Ona aisea? Ua faga faga, commercialize commercialize ae overuse. A o le mea na toe omai ma Fiti, na toe cure foi i vailaau, fertilization. Na toe aumai vailaau e toe faga ai le eleele ina ia fua lelei mai

o tatou eleele. Ae pei e vaavaalua lava faapena, tulaga foi o le tatou puipui ma le leoleo, o le a taofi lou finagalo.

O le tulaga foi i tatou tests le SROS, na saunoa foi le sui usufono le afioga ia Lupematasila e talia ma le agaga faaaloalo. E pei ona ou fai atu o lea e faasolo ia certification a le tatou Matagaluega, e mafai ai ona amanaia e le faamasinoga a tatou test e aumai i uta. E tele foi le isi laasaga e tapena i ai le Matagaluega. O lea foi e tapena mo le faamoemoe lea sa ou taua i tulaga o tatou test o tatou tui.

O lea foi sa saunoa le Afioga i le Sui Palemia, e sao, o le mea lena o lea e agai i ai tualumaga. O lea se i saunoa atu pea le Minisita o le Soifua Maloloina, o lea e faatali le tatou instant test, test foi ia e aumai lava pigi nei maua nei.

Ou te iloa o le isi lena laasaga, ae se i saunoa atu pea le afioga i le Minisita o le Soifua Maloloina.

Lau Afioga i le Tumua, Tuisamau, faafetai. O le tatou faamoemoe lena o lo o i ai le tatou Matagaluega o Faigafaiva. Ua ou manatu o se taimi e le o toe mamao tapena lau pepa i le Kapeneta, e vaelua ai Matagaluega ia e 2, o Faatoaga ma Faigafaiva.

O lou talitonuga, ua tataua ona tumatila lava le Matagaluega o Faigafaiva. E fai lana CEO ma lana vaega, o i ina e tele ai le tamaoaiga e maua e Faigafaiva. E tatou te le i oo i ai, ae a tatou matau lelei i faamanuiaga lea ua ia tatou, ua tele le tamaoaiga o le atunuu.

O le taimi lenei, e 2 kamupani safu ia la ua i tai i le uafu. O le Huanan mai Saina ma le Deep Sea. Sa aumai i lou taimi, a o ou Minisita i le 2016. Ae faafetai i le Atua, ou te sau o la e taumafai lava e na i toeaiina, i le phase 1, ae 4 phase o le mea. Ua ou toe taunuu mai nei, ae toe aumai a latou talosaga, o lea ua amata ona toe faataavale le mea tonu lava lea.

E 200 malaga a vaafagota e 1000 i le tatou uafu lea e aumaia ia e fagogota i le tatou EEZ. O tatou EEZ e na o le 200 maila faatafafa, a o tua atu o lea e o ai vaa nei e fagogota. O lona uiga, o la e o e fagogota mai ia e le o ni ia i totonu o tatou sone fagota. Ae o lo o tatou manuia ai i tulaga o ia nei. Ma o le agaga lena o lea ou te faataua ai lou finagalo i le auala siitia mo i tatou.

E oo foi i le faatauaina o tatou faifaiva, local fishermen, tama ia e pulu. O tama foi ia, tatou fagogota pea i le aloalo ma tatou i'a e masani ona maua. Ua faatulaga foi le tatou maketi auina atu i fafo. O lena foi ua outou silafia, o le 2 vaiaso talu ai, na faatoa ave ai le tatou frozen local fish, ia alalo ia a Samoa. Na ave ai le poge ave ai ma le paumalo, o tatou i'a masani. E faatoa faataitai lava lea.

Na omai foi nai tamalii exporters e taumafai e ave, ma o le agaga faafetai lena. Ua tatala le maketi e tau tuutuu atu ai a tatou i'a ia, aua e pei o le i'a lautele lea e tele i le atunuu. Ia o le yellowfin, bluefin albacore, ma le tatou atu.

O lena tou te silafia, o le taimi lenei, o le aufaifaiva uma la e i Salafai ma Upolu nei, e uma loa se weekend e faalogo loa i le leo lena i luga i le auala, faatau atu, faatau atu. E taamilo le taavale a Savaii atoa, e masalo pe 3 ni taavale faapena, e taamilo e tausue le mea e ave i ai faigafaiva a le atunuu. Ae o lea ua faatulaga e le tatou Matagaluega se tulaga e talafeagai ai.

E faafetai mo le faiga o le tatou maketi i Afega, e faafetai foi i le tofa a lo tatou nuu na mafua ai ona... lea ua ou maua o lea ua amata le tatou maketi. Ua ou vaai o tu ai ia le Afega Fish Market. O le a tatou soosoo tauau ma le tatou Matagaluega, po o a nisi fesoasoani e maua atu mo le tatou faamoemoe.

O tulaga lava ia mo vailaau, ua toe faamanatu mai le faafitauli lea e tupu nei i le itu Asau, ma le Falevaisigano. O lo o i ai le manu ninii lea e taua e faapepepepe i le taimi e mumu ai moli o le po, ma ua le mafai ai ona tautao fiofia. O lo o talia nei le lipoti sa ou faatonuina ai le Pule o le SROS ma le Pule o le Matagaluega o le Faatoaga ma Faigafaiva, e agai se i saili po o le a lea manu. O lea ua amata ona atagia i le matou Falegagaifo. Ae o se taimi lau Afioga i le Minisita Lagolago, ona tatou toe fesootai lea mo lea faamoemoe.

Ona manatu lea lau Afioga i le Fofoga Fetalai, ua uma mataupu sa laga e lenei usugafono po o lenei foi Matagaluega. E faaoga lenei avanoa e momoli ai lau faafetai i lau Matagaluega, lau Afioga i le Ofisa Sili o Pulega o le Matagaluega, lau afioga Tilafono David Hunter, aemaise foi le afioga ia Dr. Seuseu, aemaise le afioga ia Patea. Ua ou le taua la tatou STEC, o lena tou te silafia le mea lea e tupu i le STEC, se i i ai se taimi ona tatou talanoa lea. O lau faamalosi, ia tatou lototetele. O lea lava tatou te faatonutonu folau, o a foi faafitauli e tulai mai, i totonu o le tatou galuega. Ia tatou onosai pea e sau taeao malama, a o le aoga o lo outou omai ma faalogologo i Fonotaga a le Palemene, e maua ai fautuaga lelei mo i tatou.

Le tatou aufaigaluega atoa uma, le paia mai ao seia oo i ona iu, manuia lo outou alofaiva. E faafetai i lau Minisita Lagolago aemaise foi le taumafaiga o la ma galuega vaa seelua. E faavagavaga pea lou taimi, aua lou feagai ai i le Taitaifono, tiute o le tatou Palemene, aua lou seei ai i le Komiti o Tupe.

Le paia maualuga i lena Itu o le Vai, i le paia maualuga i lau Afioga i le Sui Taitai, tainane foi sui usufono uma o le tatou Maota. E pei lava o tatou upu i le taimi ua sola, ua mavae atuvasa, ua tea foi pisaga. O lea ua seese malie lo tatou vaa, tatou te apefoe faatasi, ona o le mea o lea e tupu i lo tatou atunuu. O lau lea tatalo, ia tatou alofagia le faanonogamanu ma tatou fesoasoani i le Matagaluega o le Soifua Maloloina, e le faigofie le latou galuega. Ina ia tatou tutu faatasi e puipui Samoa i lenei faamai ua oo mai ia i tatou. E le mafai ona toa le atunuu pe a vaai mai o fai lava le mea a tatou lea e fai, lau mai lau atu. E ala foi ona tu atu i le TV, o le tau talitali o le sau lena e sau ai i ina. Ia tatou omai faatasi e moni a tatou upu.

Ua tatou le faatasi ma le Taitai o lena Itu, a o lena e afio mai lau Afioga i le Sui Taitai, tatou te le toe faia faiva o matematega, a ia moni le tatou sogi.

E faapito lava se tala i le mea na tulai i lenei taeao, i lea foi sui usufono. E auau lava leaga o le uso, ae alolofa e fautua ifo. Ua uma atu foi le mea na fai nei, ae alu valo mai i le TV, fai mai foi isi upu e atagia ai ona tatou tau faatauvaaina le Nofoa lea. O lau tuualalo lena lau Afioga i le Sui Taitai. E le aoaia e Laupuaa Tamafaiga. Ia tatou o agai i luma e tauave la tatou galuega, o lea e faasolo ona fai. Ae faapena se lagona.

O Ofisa Sili o Pulega o Matagaluega a le Malo, e momoli le agaga faafetai, faafetai lo outou galulue. Aua ne i outou masalosalo i la outou maa lea e togi. E i ai le aso e saofai ai le tagata o outou i i, ona outou lagona lea o le lagona lea matou te lagona ai. There will be a day, o le atunuu lenei, o le tatou atunuu, o le tatou Malo. Ia tatou pulupululima faatasi, o lea ua outou vaai mai, ua sologa lelei mea uma ma le finauga o fai nei, e atoa le tausaga o fusu. O lea ua outou vaai mai ua sologa lelei mea uma. O lau tatalo, omai laia tatou agai i luma, ma tatou fusifusi faatasi. E le fai mo i matou le pito lenei, e tulai mai foi se isi taimi, ae pule le Atua i Lona taimi, e pule Samoa i lana filifiliga.

Lau Afioga i le Fofoga Fetalai, e faatai sou leo, tatalo pea i le Atua ia maua lou tootai, leaga ou te lagona le vela o le Nofoa lena e te saofai ai. Ten years, I have been serving there, ou te iloa lelei. A ia maua lau tofa faale-Atua, maua foi lau tofa faatamalii ma lau tofa ia malu ai le atunuu. E leaga e leai lava se isi e toe autalaina pe auau Samoa, a o lau mea lena o lea e fai. O le galuega fita lena, o lea e te feagai ma lau Afioga, o lou auauina o fingalo o manatu ma lagona, o le laau fulifuli mamafa. O lea e fai atu ai so matou leo, o se upu ua laavale, ia mau le tofa a lau Afioga i le Fofoga Fetalai.

Ia manuia le faafofoga mai a si o tatou atunuu ma tafa e fia, i ou mamalu faale-atunuu, ou mamalu faale-Tala Lelei, tainane le tapuaiga i mamalu faale-malo, o paia ma mamalu o Samoa o alala ma papaaao i atunuu mamao.

Ia soifua ma ia manuia le tatou Fono.

**FOFOGA FETALAI:** Ua faamalo tanoa, faamalo sausaunoa i lau Afioga i le Minisita o Faatoaga ma Faigafaiva, e faapea foi le SROS ma le STEC. E talitonu o lea ua faafofoga ma le totoa le paia o le Maota, i lau saunoaga ma faamalamalamaga e tusa ai foi o mataupu sa laga e sui usufono o le Maota. Ou te talitonu foi, o lea ua faamalieina sui usufono mamalu, o e na laga o latou finagalo aemaise lava, e le o tagatasi lava i le faamoemoe o le Tala Faatatau Faaopoopo o le Tupe, a o lea lava ua e saunoa faalauaitete, ina ia manuia le atunuu atoa. Aemaise lava o le toe faafoi o Samoa i faatoaga, o le ivitu o le tamaoiga na tatou omai ai talu ona tatou Tutoatasi. O lea ua oo i ai fuafuaga a lau Afioga i le Minisita o Faatoaga, faapea foi le Faigamalo. O le mea lea, malo faafetai saunoa.

O le taimi lenei o le Afioga i le Minisita o Galuega, Felauaiga ma Atinae Eeseese.

**Tofa Hon OLO FITI AFOA VAAI:** Ou te faafetai atu i lau Afioga i le Fofoga Fetalai, ua maua so matou avanoa. A o le i faia se matou tala agai i le galuega o lo o faatino nei, e fai au ma sui o le matou Pulega uma o lo o matou galulue faatasi, matou te faapea atu ai, auai matou nei i le taulaga na e siitia i le taeao ua sola. Tatou faafetai ai le alofa ma le agalelei o le Atua, e le gata o le taitai mai o lo outou soifua ma so matou ola, i le tatou galuega ma le tatou valaauina, a o le malosi foi ua mafai ai ona tatou oo mai i lenei itula o le afiafi.

E ui lava lau afioga i le Fofoga Fetalai o lo o feagai i tatou ma mafatiaga o le faamai nei, ae maofa foi i le agalelei o le Atua. E faafetai ai i tuua ua mavae ua fai i lagi lo latou soifua i le faavae ua faavaeina ai lo tatou atunuu. Aemaise lava lo tatou Palemene, i lo tatou faamuamua o le Atua ia tatou galuega fai. Ia ae ao lava ona ou faapea atu, e le moe le fili. E ao lava ona tatou faaeteete i le tulaga, i le lepetia pea o tatou taumafaiga ma le tatou auaunaga i le Atua.

A tatou tomanatu ia Iesu ma lona ausoo e momoe faatasi, talatalanoa faatasi, e mulimuli le ausoo ia Iesu. Ae na oo loa ina afatia le latou folauga, ona i ai lea o le fememeai. Aisea? Ua leai se faatuatua. Ae na aliae ai i ina ia lo latou faamoe o le Atua i le taumuli o le latou folauga, i le sa lea. Na iloa ai e le i faamuamua le Atua i le latou folauga, o le ala lena. Ona ua sola ai le faatuatua ona o le tulaga le faamuamuaina o le Atua i le latou folauga. Ia tatou faapena, ia tatou faamoemoe i le Atua, ma tatou faamuamua le Atua i le tatou folauga e le faigofie.

Ia faafetai i le Komiti a le NEOC, e matauina lava lo outou gapatia, e le maua se malologa, talofa e. Ae faamalo lava le galulue, faamalo le tautua atunuu. E talitonu o lea ua atoa tupe o le taulafoga i ou sa ma ou faiga Samoa. O lea sa lafo tamua tootoo sinasina o le atunuu. O e na faia mai i le fuifui, aua le tatou galuega ma le taitaiga o le tatou Malo ia manuia, aua Samoa nei ma e lua.

E amata sau faamatalaga e faafetai atu ai, i sui usufono uma o le tatou Palemene, o tama foi ma tina o itumalo taitasi. I outou sao taua i itumalo, e ala i la outou tofa. Ma le augani o talosaga, o le timai o le fautuaga mai, e talia ma le agaga faaaloalo ma le loto maualalo i se matou tala.

E masalo e faaopoopo atu se matou tala, o lea ua outou faafofoga i le tulaga, i na i fuafuaga ma faiga faavae fou o lo o saga matimati ai tulaga o galuega a lo tatou Malo. E le faapea foi ua sui, e leai na o le faaleleia atili o fuafuaga, e pei ona faataoto mai e le Faigamalo ua tuanai, faaleleia atili.

E amata mai lau Afioga i le Fofoga Fetalai, i le Pulega o le LTA. E faalogologo lava ma le totoa ia outou afioga. Atonu e leai lava ma se sui usufono na misi le tatalo mai. E i ai foi fautuaga na aumai, aua sa ou nofonofa lava ma mafaufau i le tele o tausaga ua mavae atu, a o talosaga lava ia e tasi. Ou te lagona lelei ia outou lagona ma manaoga o outou itumalo, leaga sa ou nofo mai i ina ma ou lagonaina le lagona lea.

Lau Afioga i le Fofoga Fetalai, e leaga le tele o faamatalaga ae le faia ni galuega, ae o lena ua outou silasila, e pei ona fai atu foi sau tala i le taimi ua sola. E alu atu lava le asiasiga a maua nei ma le Sui Minisita, ma le Matagaluega ma le Ofisa Sili A matou tau atu lava i le tulaga ua manaomia le faalelei, e faalelei lava i le taimi lena. Ma ua faamaumauina uma lava ia tulaga o talosaga e pei ona tuuina mai i luma o le Maota.

E pei ona fai atu sau faamatalaga i le taimi muamua ma le taimi ua sola, e pei sa agai lava ia le tatou atinae i auala galue, ma o la foi e faafogafoga mai le mamalu o le atunuu. O lena atinae e pei foi ona taoto mai i le Faigamalo talu ai, o se atinae taua. Ma e faitau fia miliona na faaalu ai, peitai i le matau mai ma le matau atu a le Faigamalo nei, e fua lava le fua mai o le atinae lea, ia tatou export. Pe fia ni tatou container talo, taamu, o fai ma mea faapena ua agai i Niu Sila, Ausetalia, po o se isi atunuu.

Ae paga lea, o lea e maua lava i faamaumauga e le o i ai se tulaga solosolo lelei. Ona ou manatu lea e le faapea o le a tuu ai. ae na ou manatu lava, e pei ua agai tele i tua le silasila a le Malo na i ai, ae faatauagavale pe o le misi i le latou silasila i le tele o alatetele i totonu o le talafatai o le taulaga. O lo o papaaao ai foi le mamalu o le atunuu atoa o Savaii ma tua, o lo o faaaoga ai fanau ma tulaga faapena. E tilotilo i le isi itu i le saogalemu, tilotilo i le soifua maloloina o fanau ma aiga i totonu o le talafatai o Apia, ina ia faalelei auala e faaaogaina. O le tulaga lena, o le isi foi vaega, e pei ona ou fai atu, e le tuua ai le faiga o aualagalue e galulue ai le mamalu o le atunuu. Ae i lau taamailosaga ma lau asiasiga i Salafai ma nisi o vaega i inei i Tumua. E i ai lava afioaga e le i faia lava ni aualagalue. E tasi lena faamuamua ua tilotilo i ai le tatou Faigamalo, ua tataua ona ave i ai le faamuamua.

O nisi o auala e pei ona talosaga mai e a outou afioga, ua uma i ai la matou asiasiga. Ma o le tele o nei auala, o auala o le a toe faaleleia. E i ai foi nisi o alalafaga ina ua ou taunuu atu ma tatala lena auala, na saunoa mai lava nisi o alalafaga, o le faatolu ai lea ona tatala. Ona ou iloa lea, o le faatolu ai lea ona fai. Ae talofa e i nisi o alalafaga e le i faia se galuega.

E lagona foi le faanoanoa i nisi taimi ina ua faasolo atu le polokalame agai i le itu i Sisifo. Sa ou oo lava i se tasi o auala, ola, masala pe lata i le 200 le mamalu o le atunuu o lo o papaaao ai. Ae avatu masini o le a amata le galuega, ae taofi mai. Ona ou faanoanoa lea, ae faigofie ai foi lau galuega, toe tapena ou toe oso i luga o lau masini ou toe alu. Ua uma ai foi ma le avanoa lena.

Ou te faamalulu atu i le Afioga ia Tuisamau, na alu atu lava le matou faasologa, peitai ane, o lea sa lagia le afioaga. E le o se faapea ua e teena le matou galuega, ae i ai tulaga mafuaaga taua, ma o lea, o le a toe foi mai lava matou, matou o atu i le tou afioaga ma tulaga i auala sa fia faalelei.

Ae le mamalu e o le tatou Palemene, ia lava mai pea le onosai. O lena ua outou silasila, e leai se matou tupe faaagaga i le Tala Faatatau Faaopopo o le Tupe leni. O nai seleni mai le Tala Autu o le tausaga na tea nei, o lea e



alu ai le tatou faasoa. E le o toe mamao foi Iuni latou, ae pei ona ou fai atu, o lea o le a ave le faamuamua i alatetele e tatau ona ave i ai le faamuamua.

Ia outou lava papale pea ma onosai, e leai e faasafua pea le tatou galuega ma le faaleleia o itumalo e pei ona talosagaina.

I le taunuu mai i le Suavai, masalo o lena ua outou molimauina le tulaga i le suavai. E po ua 4 nuu ma afioaga iinei i Tumua ua oo atu i ai le faamanuiaga o le suavai. O Salafai e tasi le afioaga ua oo atu i ai le suavai. O lea lava e tau posiposi ia tatou seleni na tuuina mai e le Malo, a o lea e alofa mai lava le Atua, ai lava e faaopoopo ifo lava e le Atua ia tupe i totonu o le matou faaputugatupe, e faatino ai galuega. Ai ona o le silasila mai o le Atua i le galala o na i nei tagata i le fia feinu. Ma a fua atu i ai i afioaga nei e 5, e masalo pe 5,000 foi ia tagata o lo tatou atunuu, ua oo i ai le suavai mo se taimi muamua.

E faafetai atu ai foi i le Ofisa sili o Pulega ma le galuega sa faatino, ma le faapolokalameina o le tulaga o le suavai. E i ai ia tatou poresoles o lo o reserve i le taimi lenei. E i ai ia le tatou borehole i o i Moamoa, ma o lena e reserve mai i ina ina ia aumai le suavai i gatai i le talafatai o Apia ia pe a manaomia. Ia pe a oo foi la ina utiuti ia le tatou suavai.

O le isi tulaga molimauina i le suavai, ua tele Talosaga mai i nuu ma alalafaga o lo o latou faaaogaina ia vaitumaoti. Ua toe fia agai mai i le vai lea o le SWA ona o le tulaga foi lea o le soifua maloloina. Ma e talia i le faafetai ia le tulaga ua i ai ia le vaega lea. Na pau lava o le tulaga lea e i ai, ia o le tofa lava a alii ma faipule o se alalafaga o lo o i ai ia le vaitumaoti, ina ia o latou faamatuu mai ia le afioaga e faaaogaina le vai lea a tatou mai i le SWA.

O le mea moni lava o vai na, ia e i ai lava taimi e palapala ai tulou le Maota, ia ona le talafeagai lea ma le soifua maloloina o le mamalu o le atunuu. Ia ae tatala pea pe a faapea o faafogafoga mai ia le tele o afioaga o lo o i ai vaitumaoti ia, ia o lo o tatala pea avanoa e le tatou Pulega o le Suavai ia pe afai lena, ua malilie uma alii ma faipule o le a tuu mai ia ona faapena foi lea ona matou fesoasoani atu.

I le tulaga lea o le tatou Pulega o Uafu ma Taulaga, ia e le i tele lava ni fesili sa tuuina mai e le tatou Pulega lea. O lena foi sa outou matauina ia le agaigai pea i luma o galuega faatino a le afioaga i le Ofisa Sili ma le latou Matagaluega. Ia sa outou matauina ai le \$3 miliona mai i le dividend i le 2020/2021. Ia tasi na faailoga o le tulaga siitia o tupe maua mai i le tatou uafu i Matautu. E le faapea la o le sii o tatou tau foi ia i containers, a o tulaga o transshipment foi ia o latou empty containers lea e aumai uma iinei ma toe lau atu i fafo. O la e charge ia ona maua ai lea o tatou tupe maua.

Ia e le gata i lena, ae o le faaaogaina o tatou pailate i le aumaiga o tatou vaatetele foi ia o vaaoloa ma tulaga faapena i totonu, ia e feoloolo foi lava sina tatou tupe o lo o maua mai ai i ina.

I le tulaga o le uafu lea i Asau e pei ona tatou vavao mai ai i tausaga e tele ua mavae, ia o lea ua i ai le kamupani ua o matou talatalanoa ae e le i faapea ua i ai se faatagaga ma se faamaoniga a le afioga i le Palemia ia ma le mamalu o le Kapeneta. Ia i le tulaga i Asau, ia ma o lena foi kamupani o lea e iinei o lo o latou faia le uafu, e faaleleia le uafu i Matautu. Ma o latou, o specialists i le faiga o mea ia o mea tau uafu. Ua i ai foi la ia le latou masini o le a faatino ai le faaloloto o augutu o le ava lea e i Asau, ina ia mafai ai ona taula ai ia vaatetele i totonu o lea uafu. Ia faapena foi ona aumai ia latou ideas e fesoasoani mai.

O la o le a latou aumaia ai se auala slipway e mafai ai ona lipea ia vaatetele e pei o le tatou vaa lea e ave i Tutuila. Ia na ona ou faailo atu faapena, ia le tulaga manaia foi ua oo i ai ia le tatou fuafuaga i le tatou uafu lea e i i Asau.

Sa taua e le afioga i le Sui Fofoga Fetalai ia se uafu i Manono. Ia lau afioga i le Sui Fofoga Fetalai, ia o lea foi ua tapena le tatou Pulega, e faaoga atu ai le uafu foi lea sa i i le Marina. O le uafu la lena o se taimi muamua lena o le a avatu ai le uafu lena, o le uafu foi lea a sua le tai ua alu i luga a pe foi ua alu i lalo. E float le uafu lena, ma e talafeauga lelei ma Manono ina ia agai pea i tai le uafu leaga a pe le tai e matauina ia ua ali le pala foi lea ua leai se suasami e fetau lava le uafu lea i le tatou motu i Manono.

O le tatou Pulega lea o le Samoa Shipping Services, ia e puupuu lava sina sina update, o le taimi lena ua 350 a tatou aliivaa po o tatou alo ma fanau a le atunuu o lo o galulue nei i luga o vaa i atunuu i fafo. E 29 nisi o aliivaa faaopopo i le amata ona tuuvaa atu ia Fepuari i le masina fou ia ma Mati. Ae o la foi e ready mai le 77 fanau o le tatou atunuu o alo ma fanau o lea ua faamanuiaina latou aoga i le Maritime, ia o lea foi e tapena le tatou Pulega e saili pea ni vaa foi lea e le gata i vaaoloa, ia ae o vaalaupasese foi lea o meli, ia e faafaigaluega uma ai ia tatou fanau.

O le tulaga i le Samoa Shipping Corporation, ia ona ua i ai le tulaga o le pau o pasese ma tulaga faapena, ma o la foi e molimauina lava le tulaga o la e solo lelei pea ia le latou tupe maua ma mea faapena. Na fesiligia ai foi la e se tasi o sui usufono mamalu ia le tulaga o le replacement o le Lady Naomi. Ia lau afioga i le Fofoga Fetalai o lea e fuafua ia le tatou vaa lena i le tausaga lena pe a fetau lava ma le tulaga foi lea o le faagaioiga o le latou galuega, ia o le a aumai ai ia le tatou vaa fou lena.

I le tulaga i le MWTI, ia faafetai atu foi i le Matagaluega o lo o gafa pea latou ia ma le faagasologa pea o le tatou poloketi foi o le waterfront. Ia faapena foi le poloketi foi lea ua outou silasila foi i ai i vaitafe i Vaisigano ma Sinamoga ma Moamoia, ia o la ua i ai ia faiga fou i le fesoasoani atu a le Matagaluega i le galuega foi sa faatino muamua e le MNRE. Ia o la ua galulue faatasi latou i le faalolotoina o vaitafe ia, ina ia taofia ai le toe oso mai i luga o se vai ma lolovaia ai le tatou taulaga e pei ona i ai muamua. Ia o tatou talosia, ia aua ne i i ai ni tafega, ae a faapea foi e tafe mai, ia ou te talitonu lava, ia ua foia lea faafitauli.

Ia oo mai i i i le tatou malaevaalele, ia o lena lava ua outou faafofoga. E pau le mea e taua e pei ona ou taua i le auunaga a le tatou malaevaalele po o le Samoa Airport Authority, ua i ai le tatou masini manaia lava lena ua i ai i le taimi lenei o la e fesoasoani i le Matagaluega o Falemai, e latou te o le mea foi lea o le human body scanner. E latou te pikia ai pe e te savali ifo i luma, e piki atu lava le tulaga ua oo i ai le fiva.

Ia o la e pei o se mea e faalua ai le siakiina o tagata ia e agai mai i fafo, ia ae o lo o ave pea lava ia le faatuatuga ma le faamuamua i le galuega a le Matagaluega o le Soifua Maloloina.

Ia ona ou oo mai lea lau afioga i le Fofoga Fetalai i le Matagaluega lea o le Eletise. O lea sa laga mai e se tasi o sui usufono le tulaga o le faia faasolitulafono e le Malo o le faapauina o le eletise. Lau afioga i le Fofoga Fetalai e ogaoga lava ia tulaga foi pei sa aumaia e le sui usufono mamalu, ae ou te faamalulu atu i le afioga i le sui usufono mamalu o le mea lena na ou le tali atu ai ona o le tulaga o le vaega lea e pei ona e taua ma e fesiligia, ia o lo o manino lava le tulaga o le Tulafono o Eletise 2010, i le fuaiupu 19 (5), ia ma le fuaiupu 20 (4).

O la e manino o lo o faapea mai e ao i le kamupani ua laiseneina ona faatulagaina se faasilasilaga faalauaitele o lea suiga e ala i vaega faasalalau o le tulaga lena. O Tulafono aua sa ou i ai i totonu o le Tulafono lea i le 2010. Na ou auai i le Tulafono lea i le aumaiga e pasia. O le Tulafono lenei, e po o le a lava, ae seivagana ua faasalalau faalauaitele ni suiga. Ia o lea na molimauina na faasalalau mai lava e le afioga foi i le Minisita o Faatoaga ia le faapau i lalo o le tau o le eletise ma le vai tausaga na tea nei. O lea lava e sosolo lava ia tatou i luga o le Tulafono.

Ia e oo foi la i le tulaga lea aua ou te le i maua le faaiuga a le Kapeneta tuai na i ai, ia o lea foi e manino mai, sa aumai le FK a le Kapeneta masalo o lea e silafia lelei e le afioga ia Lautafi i le Pule Faatonu ina ia toe silasila i ni tau e faamama avega ona o le tulaga o le Koviti. O lea la ou te vaai atu foi i le tulaga lea ma e a oo loa i tulaga o le Tulafono i lalo o le SOE pe o le State of Emergency, e i ai Tulafono e suspend ai mea ia. Ae aumai le order po o le instruction a le Komiti e foe ai ia tatou galuega. O lea la ou te maua ai le faaiuga lea a le Kapeneta talu ai lea na tatalo mai ina ia toe fetuunai ni mea e fesoasoani i le mamalu o le atunuu.

O le isi foi itu, e faigofie e tatau lava ona tilotilo totoa i le tulaga o lea ua pau i lalo ia le tau o le tatou eletise ma le vai, e faigofie lava la ona alu ai i le itu lena. Ae seivagana ua sili atu i le tau sa faataoto mai e le Pule Faatonu, ia ona i ai lea o se fuafuaga faapena. Ia ae e pei o le tulaga lena lau Afioaga i le sui usufono mamalu e faafetai e tauleogologo o le lapatai mai ma le tauleogologo mai ia e tatou te talanoa ma faamalamalamaina nisi o vaega.

Smart meter lau afioga i le Fofoga Fetalai o lo o talia nei ia le tatou kamupani lea e i i Amerika e ona le software lea e faatino ai ia le smart meter. Ma o le tulaga lena, ia e pule lava le afioga i le Minisita o Fesootaiga

ma le Afioga i le Pule Faatonu o lea e tatali mai i le tatou Matagaluega a le EPC. Ae o le mea lea e i ai nei, ia atonu te i ua oo atu i lea vaiaso ua maua mai se tali. I le tulaga lava lea o le le transparent lelei o le information i luga o le latou display units ia e faaali mai ai, o le le faaalua mai o le aofaiga o iunite, ae faaali mai na o tulaga o tupe. Ia ou te ioe i le tulaga e pei ona i ai le finagalo o le afioga i le Minisita o Fesoootaiga ua taofi ai i le taimi nei ona toe faapipii ia ni smart meter.

Ia ae faapea lava e oo atu e aumai se tulaga se fautuaga mai i le kamupani lea e i ai le software lea, ia a tatou tilotilo atu lava e le talafeagai, e leai se faigata e tatou te toe foi lava i le cash power. Aua e na o totonu lava i i le taulaga, o lea na faataitai ai le faaaogaina o smart meter. Ia e aoga tele ia le smart meter i le tulaga o le tekonoosi ua i ai nei. Ae a tatou fua loa i le mea lea e complain ma sai mai ai le atunuu, ia o le mea la lenei tatou te faaeteete i ai.

Ia, i le tulaga foi la lea i le pau o le 20%, lau Afioga i le Fofoga Fetalai, i faamaumauga lava ia a le Matagaluega i tausaga uma i mea ia o new connections, o le new connections i tausaga uma lava o le average e i ai o le 15 new connections i le tausaga. Ina ua faapau le 20% lea o lea ua 5 nei masina, ua 89% new connections ua i ai, ae na o le 5 masina. Ma o le faamaumauga lea mai ia Tesema o le tausaga na tea nei, o lea ua tatou ia Ianuari, ou te talitonu lava ua pasi atu ma le 100 aiga ua mafai ona latou gafatia le eletise i le tulaga lea.

E le gata foi i lenei, e i ai le tulaga foi lea faapea a e mamao ese mai le main line, le main feeder lea e i luga i i, e totogi e oe le laina ma poumoli e sau i i. Lau Afioga i le Fofoga Fetalai, e tasi lenei faamamaavega ua faatino nei e le tatou Malo e ala mai i le Pulega, lea la e aumai ai le ata lea o le gafatia e le atunuu ona faaoo atu i ai le eletise, gafatia le eletise. Ia, o le tulaga lenei e pei ona i ai le tatou 20% lea.

O le isi vaega sa ou tilotilo foi ma silasila foi le Afioga i le Pule Sili o le EPC i le tulaga foi lea o le mea nei o transformers, three phase transformers i mea o factories, o le taimi lenei ua fa transformers ua uma ona tuuina atu i tua, ma ua fa foi factories ua amata i le taimi lenei, o lo o faigaluega ai le tele foi o alo ma fanau a le atunuu. Ia ae na i ai lava tulaga foi lea pe \$50,000 ea e te totogi faatoa avatu ona fai foi lea o le fesoasoani a le Pulega ua leva ona amata mai, o la e foi e silafia e le sui usufono mamalu sa faauluulu i ai le Pulega, ia e faaafa laia pe ave i ai le discount. Peitai e i ai lava le tulaga le gafatia foi lea, ia o le taimi la lea, o lea ua allow i ai le tulaga o transformers ia. Ia, ona faaauau lea ma faaoga le eletise. O le mea lea e i ai ua matauina, pe 3 lava masina toe kava uma mai le \$25,000 lea i pili faaaogaina o le eletise e factories ia, ma o le mea ua leva ona tataua ona fai.

Ina ua ou taunuu i le Ofisa sa ou fesili i le alii Pule o le Faalapotopotoga o le EPC, na ou fesili i ai, e mafai ona fai le mea lea o le faapau o le 20% o le tau o le eletise. Na ou fiafia lava i lana tali, fai mai, lau Afioga i le Minisita,

ua leva ona tataua ona fai. O le mea la lenei ou te fiafia ai tele i le Pule Sili o le EPC, e fai o le toa o lona loto, a o lea ua leva ona nofo ma lana plan e fesoasoani ai i le atunuu. O le mea lea ou te viia ai tele lau Pule lea, ia faamanuia le Atua i lau afioga.

O le tulaga lea ua i ai, ia lenei ua outou silasila na o le \$2 miliona le vaegatupe a le CSO o lo o fesoasoani i tulaga ia. E sao foi le sui usufono mamalu na ia lagaina le tulaga, o le tupe lea e totogi ai le pili o le eletise o lo o faaaogaina i tatou street lights, ae ua alu i luga tatou street lights ia i le tele o street lights, ia ua alu faasoloatoa ua faaletulafonoa le tatou amio, ia o lea la e taumafai lava ia control ma lava le tatou tupe ona e manaomia foi le faamalalama o nuu ma afioga i le tulaga o tatou street lights.

O le upu moni lava, e tatalo foi i le Afioga i le Tamaitai Palemia ma le Kapeneta, faamolemole, e le lava le tai \$2 miliona lea aua le fesoasoani i le mamalu o le atunuu. Ia talosia, tatou tatalo le Suavai ma le EPC, ia pe maua se tatou faamanuiaga ona o le tulaga lea. Vaai i le manaia o le mea lea, 89 new connections, 89 tatou mita ua faapipii ai, ia, o le sau o le seleni lea o le a siitia le tulaga o tatou tupe maua. Ma e pei lava ona ou fai atu i le tausaga ua tea nei, o le faiga lenei o lea o le a matua siitia ai manaoga i le faaaogaina o le eletise, ma e vave foi ona toe siitia ai tupe maua a le tatou Pulega.

E i ai le isi vaega sa ou matauina le tulaga o lo o i ai se afi lisi o lo o faaoga i le tatou motu tele i Salafai. Ia, o le tulaga e fai lava si taugata tele o le lisi lea na lisi ai le tatou afi lea i Salafai. Ma e fiafia e tau atu i luma o lau Afioga i le Fofoga Fetalai ma le mamalu o le Maota, o lea ua taunuu mai le tatou afi, afi lava a le tatou Malo, ia o le a ave i Salafai e faapipii ai, ona toe aumai loa lea o le afi lenei a Niu Sila e toe faafoi i Niu Sila, ai ua tele ai ni a latou seleni ma tulaga faapena.

Ian a pau lenei lau Afioga o nisi o mea sa laga mai e sui usufono mamalu.

**Afioga Lupematasila Galumalemana Tologata Togia Tile Leia:** Lau Afioga i le Fofoga Fetalai...

**FOFOGA FETALAI:** Ia, e i ai se mataupu fou po o mataupu lava ia sa e laga muamua foi le sui usufono mamalu? Saunoa mai le sui usufono mamalu o Falelatai ma Samatau.

**Afioga Lupematasila Galumalemana Tologata Togia Tile Leia:** Faafetai i lau Afioga i le Fofoga Fetalai mo le avanoa. E leai, o lea lava sa nofonono ma matau i le saunoaga matagofie a le Afioga i le Minisita, a o lea foi ou te matau atu, o lea ua faamulimuli lava e le Afioga i le Minisita le Faalapotopotoga o le Malosiaga Tau Eletise ona ai e manatu ia aua ne i ou faalavelave i lana saunoaga. O lea foi la na ou tuu lava se i maea lelei le saunoaga a le Afioga i le Minisita. E momoli atu le agaga faafetai tele i lau

Afioga i le Minisita, ua e tali malamalama i nisi o mea sa laga foi i le lauga a lenei sui usufono. Ia, e leai se agaga e faatauta i lau Afioga, aua e i ai le manatu, po o le a lava se faamalamalama e avatu, ia, o le tali lava e aumai e lau Afioga o le tali lena. Ae na o nai mea laiti lava leaga o la e faafogafoga mai le atunuu e tatau ona avatu i ai se tuualalo.

O lea ua e saunoa i le Tulafono o le Eletise, ia e pei lava ona silafia e 30 tausaga o ou faigaluega i le EPC, ma o lea ou te malamalama lelei i le Tulafono o le Eletise. Ae pei lava ona ou fai atu, ia o le a taatia ia faapea, o le a ou talia lau faamalamalama. Ia tatou faia le tala foi lele, Samoa, faamasino mai oe. A fia malamalama foi o la e i ai le Tulafono o le Eletise 2010, e mafai ona faitau vailiili i ai.

Na saunoa lau Afioga e faamalamalama nisi o vaega po o faafitauli o lo o feagai ma le tatou poloketi tele lea sa faagasolo o le smart meters. Ia...

**FOFOGA FETALAI:** Se i fesoasoani atu lava i le sui usufono mamalu, sa laga i lau saunoaga le fuafuaga lea? Pe o lea faatoa maua ou manatu nei i le...

**Afioga Lupematasila Galumalemana Tologata Togia Tile Leia:** Ia, o mea uma lava ia o lea sa laga i lau lauga. Ae ou te fia fesoasoani i le Afioga i le Minisita e tau faamalamalama foi, aua e tele lava nisi o lo o faitio i le mea lenei o le smart meters. Ae ou te tautino atu i lenei Palemene, talu lava ona faagasolo le poloketi lenei o le smart meters, o au le isi tagata sa muamua lava faapipii le smart meters. Ma e oo mai lava i le taimi lenei, e leai ma se faafitauli o lau meter o i ai.

Ma o le fautuaga foi lea na avatu i le Faalapotopotoga, o le isi vaega lea e complain soo ai tagata, ona e faapea mai e leai ni numera o iunite o le eletise o i luga o le meter, ae ao ona silafia lelei, o le tekonolosi lea ua i ai nei le smart meters, e eseese laitiiti lava ma le cash power. O le cash power e faatau muamua au iunite ona pani lea i o i le meter, lea la e maua ai iunite o le eletise. A o le tekonolosi fou lea ua sau o le smart meters, e real time e faatau ai lau eletise.

**FOFOGA FETALAI:** Ia, ou te fesoasoani atu i le sui usufono mamalu, o lea o le a e toe lauga mai. Sa tuu atu nei le avanoa na o se fesili i se mea e fia faamalamalama. O le uiga lena o le faauilavea, a o lea e matau atu o lea o le a e toe lauga mai ma faaali mai lou silafia i lou taimi a o e galue i le EPC, a o lea e tau faapuupuu atu le tatou galuega lau Afioga i le sui usufono mamalu.

**Afioga Lupematasila Galumalemana Tologata Togia Tile Leia:** Faafetai, o lea ua maua atu lou finagalo.

**FOFOGA FETALAI:** O lea ua saunoa manino le Minisita i mea uma lava ia ua e toe saunoa mai i ai.

**Afioga Lupematasila Galumalemana Tologata Togia Tile Leia:** O le a foi foi se manatu.

**FOFOGA FETALAI:** Faafetai.

**Afioga Lupematasila Galumalemana Tologata Togia Tile Leia:** O le a fesoasoani atu i le Afioga i le Minisita i se taimi o i tua, ae faafetai foi pe afai o lena ua e maua se CEO e mafai ona faataugofieina le tatou eletise, ae se i tulimatai i le lumanai po o le a le umi e faaauau ai le pau lea o le eletise. Ia, faafetai.

**FOFOGA FETALAI:** Malo faafetai. Ia mo le faasaoina o lau Afioga i le Minisita o Galuega, tulai mai le sui usufono mo Faasaleleaga 5.

**Afioga Peseta Vaifou Tevagaena:** Faafetai o lea ua maua le avanoa se i fai foi sina malologa a le Afioga i le Minisita, ou te talitonu foi sa taputapuui lava se i sao ma uli le saunoaga foi a le Afioga i le Minisita ina ia malamalama le mamalu o le Palemene i nisi foi o mataupu sa laga i latou lauga.

A o lau tulai atu, e leai o lau mataupu, o le mataupu foi sa ou laga i lau lauga i tulaga foi nei tau faiga faavae o a tatou galuega tetele, pei foi ona saunoa le Afioga i le Tamaitai Palemia i le saunoaga muamua lava o lenei fonotaga, i le taua o finagalo foi ma saunoaga foi a sui usufono mamalu, ia ma tuualalo e fau ai lo tatou sa. Ou te talitonu foi au ia i lau matau, i lau faalogologo ma le tele foi o mea e moomia lava e sui usufono uma, ia, o le tele lava o galuega a itumalo. Ae i lau vaavaai i le Tala o le Tupe, ia e utiuti lava le faasoa a le tatou Malo. Ou te le i talosagaina foi e lou itumalo se galuega aua o lea ou te iloa, ia, e sao ai le Afioga i le Minisita, e ave le faamuamua i galuega e tatau ona ave i ai le faamuamua.

A o lau tuualalo, ona o se tulaga ia tau i galuega, ia atonu foi e fiafia ai lau Afioga i le Minisita, fiafia ai foi le Palemia ma le tatou faigamalo, fai se isi suiga i faiga faavae i tulaga o galuega ma atinae tetele. O le mea lea sa ou avatua lea e molimau mai le Afioga i le Minisita o Tupe, i le tulaga i mea ia o retention, ona i lau vaavaai i lenei taimi, ua tele lava le suiga o le tau. O a lava galuega tetele ma galuega e lelei ona faatino, e le umi lava ae faaletonu. Atonu foi o le tele ia o faitioga a le atunuu ma le tele foi o nisi o sui usufono o faapea mai i le tele o galuega e faaletonu. Ae na ou vaavaai lava lea o au ma ou manatu, pe le fai se isi faiga a le tatou Malo. O se matou tuualalo e ala atu i le Afioga i le Minisita, i le 10% foi lea o le retention, ae a pe a

aveese lea 10% ae fai loa se 10% a le tatou Matagaluega e tua i ai le tatou Matagaluega aemaise lava le Malo, maintenance fund.

**FOFOGA FETALAI:** Ia, o lea ua maua atu le finagalo o le sui usufono mamalu. E sao e taua foi leaga sa laga foi i lau saunoaga. O lea ua faafofoga atu ma le totoa le Afioga i le Minisita o le retention lea ua faauilavea mai ai, ia lea ua maua e le Afioga i le Minisita...

**Afioga Peseta Vaifou Tevagaena:** Ia, lau Afioga, faafetai. Ia leaga o lea ua see ese le Minisita ua faaiuiu e le i taua le mea lea, ae o le taua lea pei ona saunoa le Afioga i le Palemia, e taua foi ni a matou tuualalo atu foi e fau ai lo tatou sa mo le manuia o Matagaluega, ona o lea e taotoo atinae tetele a le tatou Malo, lea e faatupe e le World Bank, ADB ma grant mai isi atunuu. Ae ou te iloa e tele lava le tatou 10% e maua mai atinae nei lau Afioga. Ia o le a faapuupuu atu i ina i lau Afioga i le Minisita. Ma le faaaloalo lava.

**FOFOGA FETALAI:** Ia, malo faafetai. Mo le faasaoina o lau Afioga i le Minisita, tulai mai le sui usufono mo Anoamaa 1.

**Afioga Alaiasa Moefaauouo Malagaitutogiai Sepulona Moananu (Anoamaa 1):** Faamalo faafetai mo le avanoa i lau Afioga i le Fofoga Fetalai, o lea foi ua saausi lava finagalo aua le saunoaga ma lea foi ua tali le Malo i nisi o mea sa lagalaga. E momoli atu le faafetai i le saunoaga a le Minisita o Galuega, ua matauina lava ma le totoa le matagofie o nisi o faamama avega ua faatino nei mo le tatou atunuu. Ia o mea ia e leai lava se isi e le fia lagolago i ai lau Afioga ona o faiga faavae foi ia pei ona taua e le Palemia, ia e eseese a tatou faiga faavae. E pei o nisi e naunau i le mea o le tupe maua, a o nisi e naunau ina ia faasafua le manuia i le atunuu.

A o le tulaga lea o auala foi ua faalogologo atu i le saunoaga a le sui usufono, ua uma loa ona fai lau lauga ou tietie loa i le auala lea na saunoa ai le Afioga i le Minisita na ia faatonuina lana afaigaluega i o i si o matou nuu lea i Lalomauga. Ou te le iloa la po ua toe asiasi i ai le Afioga i le Minisita, a o le auala lea, e le se auala galue o le auala o le nuu mavae ua leva ona ta mai aso ia. O le nuu foi lea o matou i Lalomauga, ua leva ona i ai afi ia e sau ai nei le eletise e sau i le suavai. O lona uiga, o la e i ai le aoga mo mea o punaoa faalenatura i le nuu mo le atunuu. Ae faamanatu atu i lau Afioga, e le o se auala galue la le auala lea na e taua, ae ou alu atu, ia na o le faaputupuina lava o palapala i autafa foi lea i masini, ia se i alofa ifo se i fai faamaea.

Ia toe tasi lava le mea lea e fia faasao i lau Afioga e pei foi ona saunoa le Minisita, ona o la e faafogafoga mai le atunuu, ia ua muaai lava le saunoaga a le Minisita i le Tala o le Tusi Paia, ioe. E eseese la le ma matau ma le Afioga i le Minisita i le mea na tofa ai Iesu, fai mai ua faamulimuli e le ausoo



Iesu, ae ou te lagona lava e au ia i lau mataupu silisili, o la e sao le mea sa taoto ai Iesu. Ia ma le agaga faaaloalo. Ia manuia le tatou Fono.

**FOFOGA FETALAI:** Faafetai o lea ua maua le...

**Afioga Hon Lautafi Fio Selafi Purcell:** Lau Afioga i le Fofoga Fetalai...

**FOFOGA FETALAI:** Ia, e te agai i le Minisita pe te agai ia Iesu la e taua mai e Anoamaa?

**Afioga Hon Lautafi Fio Selafi Purcell:** E leai, o au ia ou te le masalosalo i le mea na tofa ai Iesu. Faafetai. Na tofa lava Iesu i le mea sa fia taoto ai ia, po o luma po o tua, ia o Iesu e iloa lelei lava e ia le mea sa tatau ona moe ai, tofotofoina ai le faatuatua o lona ausoo. Ae mafai ona ou talanoa atu i le mea lea pe afai tou te finagalo i ai.

**FOFOGA FETALAI:** Malie le sui usufono mo Satupaitea, agai i lau lauga...

**Afioga Hon Lautafi Fio Selafi Purcell:** Ia fai ma tatou totoe, o le a tau fia momoe.

Lau Afioga i le Fofoga Fetalai, faafetai i le Afioga i le Minisita mo le lauga matagofie. E i ai nai vaega sa ou talanoa ai i si ou itumalo, lea ua tau lava le talosaga i le Afioga i le Minisita, ona o faiga faavae a le tatou Malo lea ua i ai nei, i le tupe lava lea sa masani ona ou faalogo i ai, climate change resilient fund lea sa fai ai mea o taligalu, lea lava la sa ave ai lau talosaga ma le mafaufau faapea o taligalu ia e puipui latou nuu ia e aafia i le siisii o le tai, rising sea levels, ona la o si ou itumalo pei o lona e silafia, lea na toe aliali mai nei i le vaiaso atu lea i tua, na ave la i le Matagaluega lea o le MNRE. Lea na ou fai atu na ma o lava ma le Minisita o le MNRE i lona taimi. Ia na uma atu lava, na uma lea toe talosaga atu ae fai mai, ia ua leai se tupe. O lea la ou te fia talosagaina ia faiga faavae ua i ai nei, po o le mea o toe talosagaina se isi tupe, aua pei o lau tau matau, ua le fiafia lava Amerika i lalo o le latou Peresetene sa i ai ua le fia i ai i ia mea, le talitonu i le climate change, ia ma o ma ave le latou tupe. A o latou sa tele le latou tupe sa faasafua mai i nuu e i ai tatou lea na i ai isi vaega o le Pasefika e tatou te nono mai ai ma aumai e fai ai tatou. A o lea la ua ou faalogo ua leai se mea, a o le talosaga ia po o ina po o fea le mea e tatau ona tilotilo i nuu lea na aafia i le Tsunami laitiiti lea na oso nei, ae aafia ai si ou itumalo e 3 pitonuu, ae po o le a le faiga faavae a le Malo.

Ia o le mea lona lua lau Afioga, ona o lea sa talanoa foi le vaalele. Ia ou te le toe fia talanoa tele lava i ai i le mataupu lea, leaga sa ou laga i le taimi lea. Na saunoa mai foi le Afioga i le Minisita e i ai le lipoti lona a le vaega lea o

le PASO, o lou popolega lava lau Afioga, ina ne i aafia fua ia Matagaluega a le Region i se fuafuaga a le Malo ia e aua le aumaia le vaalele. Afai lava aua o le faalapotopotoga lea a le PASO, sa galulue faatasi lava ma le Samoa Airways i taimi uma lava na aumai ai vaalele nei e 3, a o lea ua te i ua oo mai i le vaalele lea ae fai mai, ua le faamalieina le PASO. Sa i ai le latou working agreements ma le Samoa Airways e galulue lava seiloga e oo i se taunuuga e fai le faaiuga. Afai lava o le faaiuga na fai ona ua faapea mai le PASO, na matou o fai le suesuega ma e le sefe le vaalele na aumai e Samoa, ou te talia ma le fiafia. Ae o le mea lea ua 2 issues lea ua tulai mai, o lea ua fai mai ua le aumaia le vaalele ona ua le faataunuuna pepa e avatu e le Samoa Airways i le PASO. O lona uiga e leai se suesuega na faia. Afai la e faapea ua le aumaia le vaalele ona ua le faia se suesuega, ia, ona aua lea le tuuaia faapea e le sefe le vaalele na aumai.

Ma ou te talosagaina ai e ui atu i lau Afioga se talosaga, ona o lea na saunoa mai le Minisita, o la e ua ia ia le lipoti a le PASO. A tatou tilotilo lava i ai ma faamautu, e sao la, o le mea lea leaga o lea e le i aumaia le vaalele. Ia ona le toe pisa lea i ai i lea tulaga. Ma lou faaloalo.

**FOFOGA FETALAI:** Malo faafetai. Lau Afioga i le Minisita, faai mai lau folasaga ma...

**Tofa Hon OLO FITI AFOA VAAI:** Faafetai. O le tulaga i le climate change fund lea pei ona e taua lau Afioga, ou te iloa o la e i ai le seleni o lo o i ai i le tulaga lena, ae o le a manino ia se faamalamalama i le Minisita o le Environment ma le Afioga foi i le Minisita o Tupe.

O le tulaga lea o le vaalele, ia, o lea foi ua e toe saunoa i le tulaga lea, ae uma lava avatu. E pei e sili lou tago e faitau atu le mea lea ina ia manino i lau faafofoga le tulaga o le lipoti lea. E i ai factors e tai pei o le mea lea na ou fai atu o lau faaitaiga o manuals o le vaalele e le i mafaia e le Samoa Airways ona tapena, o le mea taua lava lena.

Ia ma le isi la vaega ia, o factors la lea na aumai i i na mafua ai ona fai le recommendation a le PASO. Ona faapea mai loa lea o le kamupani, take in these factors into account, I am unable to continue with the task of assessing the aircraft for the issue of Samoa certificate of airworthiness and therefore cannot recommend that the Samoa certificate of airworthiness is granted. O lea ua ou lauina atu i lau Afioga le tulaga ua matua le toe faaauaua lava e le tatou kamupani lea, ona o le tulaga o le tele o vaega e le o comply i ai le tatou vaalele e tusa ai ma tatou Tulafono, le International Civil Aviation Organisation rules. O tulaga uma na e le i mafai ona comply ai le tatou vaalele e pei ona aumai. E faamalulu, ou te iloa lava na e gapatia i le taumafaiga, ae na lape le Minisita o Galuega sa i ai i lena taimi i le fesoasoani atu i lau Afioga i safety issues o le vaalele. O lea la ua e silasila mai, o lea lava ou te tuualalo i le Minisita o Vaalele, aua ne i aumaia lau vaalele e le i

faamalieina lau Matagaluega ma matou Tulafono. E faamalulu atu ai i lau Afioga.

I le tulaga e pei ona toe fesiligia e le sui usufono mo Anoamaa, ou te faamalulu atu, o au e matua lagona lava lou maasiasi i i pe a faapea o le tulaga lena o lo o i ai le tatou auala ma le konekarate o lo o latou faatinoina pe a faapea na o le suasua le mea lena. E moni, o le auala lena e le o se auala galue, o le auala e agai i afioaga e 2 o Falevao ma Lalomauga. Afai la o le tulaga lena, ou te iloa e uma le Fono ona ou oo atu lea o sau asiasiga i tua i le auala e pei ona e taua.

I le tulaga e pei ona laga mai e le Afioga, si ou uso i le sui usufono mo Faasaleleaga 5, o le taua ia o le mea ua saunoa i ai lana afioga, i le tulaga foi lea o le leai o se vaegatupe e tapa i ai le LTA i maintenance agai i luma. Aua e moni ai lau Afioga, e uma loa le 12 masina toe faafoi le 10% retention, ae uma le tausaga lena, ae amata loa ona leaga le auala e pei ona tatou molimauina.

O le fesili la, o fea la lea o le a aumai ai tupe na e fai ai maintenance ma toe faalelei ai auala? O le tali, tatou te toe tagi lava i le Malo e aumai se tupe, ae taua tele lou finagalo lau Afioga i le sui usufono mamalu. O le mea lea ua e leva foi i le faiga o nei galuega ae o tulaga o mea uma ia, aemaise lava taimi e fai ai mea ia o variations a? Ae ou te talitonu lava, e le o oo isi konekarate i le standard o le mea lea e te talanoa i ai ma e galue ai, o mea tau runway. Ae o le a talia ma le faafetai mea e pei ona e saunoa i ai.

**FOFOGA FETALAI:** E faamalie atu i lau Afioga i le Minisita o Galuega, se i tulai mai lau Afioga i le Palemia.

**Afioga Hon Fiaame Naomi Mataafa:** Lau Afioga i le Fofoga Fetalai, e fia maua se faamalamalamaga mai le Afioga i le Minisita i le mataupu lea ua talanoaina i le 10% o le retention faatoa toe totogi pe a uma le... o le a foi Pese, o le tausaga? O le fesili, se i e faamalamalama mai mo matou e le malamalama, o le a le mea e taofi ai fua le tupe lena, aua o le tupe lava ia o le tupe e agaga e ave mo le konekarate, ae i ai le mafuaaga. Pe se i oo i ai lau saunoaga faamolemole?

**FOFOGA FETALAI:** Ia, se i tulai mai le Afioga i le Minisita o Galuega.

**Tofa Hon OLO FITI AFOA VAAI:** Faafetai i le faafesili a le Afioga i le Tamaitai Palemia. O le aumaiga o le mataupu lea pei ona faatulai mai ma aumai ai le finagalo o le sui usufono mamalu, o lona finagalo i le tulaga I sana ia foi aikia e fesoasoani mai ai i le Malo i le tulaga o se vaegatupe e fai ai tatou maintenance o auala. Ia, e sao lava le tulaga o lo o i ai le faiga faavae lea, ae pei lava o lau faatupu manatu lea ua aumai nei, ia se i talanoa ai le Kapeneta ona i ai lea o se tulaga pe talia lena vaega pe leai. Ae moni lava o

le tulaga lava ia faaletulafono o lo o i ai nei, e toe foi lava le 10% o se tupe o tulaga o faiga o galuega i le konekarate sa faatinoina. Ae pei sa ave foi le, o lea ou te tau maua atu lou finagalo, o le tulaga foi lea o poloketi tetele, tai pei o le tatou galuega lea i le cross island road. O lena galuega i le amata atu i i i Tanugamanono seia paia Siumu. E \$40+ miliona Amerika lena e faatino ai le galuega lena, ae faafetai mo lou finagalo, ina ne i te i ua uma atu le tausaga lea ae toe faafoi, ia e fai lava si umi o le auala agai i tua o le a faaalu ai tupe a le tatou Malo i mea ia o maintenance ma tulaga faapena. Ia ae tuu maia lou finagalo, e i ai se taimi ona ave lea faatalosaga i totonu o le Kapeneta, pe talia lou finagalo, ae manaia tele mafauauga o lau Afioga.

O le tulaga e pei ona toe tulai mai le sui usufono mo Falelatai ma Samatau i le tatou smart meter, e sao lava oe i le tulaga i lou lava lena finagalo. Ae a oo loa i Tulafono ia transparent ia le faaaogaina o tupe a le atunuu, o le mea lena tatou te faaeteete i ai. E leai se eseesega ia tatou iloa le tatou tupe la e i totonu o le meter, ma le aofaiga o tatou iunite, ma lou alu e te faatau i le faleoloa, e te manaomia lau lisiti i lau tupe la e faaalu, ma mea sa faatau mai i lau tupe. E tutusa lelei lava. Ma o lo o i ai foi aiaiga o le Tulafono i le transparent o tatou galuega faapena, i le mamalu o le atunuu. E pei o se tala atu lea lau Afioga i le Fofoga Fetalai.

E faamuli se matou tala, e momoli atu lau faafetai tele i lau Matagaluega, i Pulega uma, i afioga ma le tamaitai Ofisa Sili mo galuega faatino, talu mai ona tatou mafuta mai ma amata le tatou galuega. O lo o molimauina lava lo outou naunau ma o le mea ou te faafetai ai, o le tatou galulue soosoo tauau ma le mafana o le tatou mafutaga, ia tatou faifaipea. Aemaise lava lau head girl lea e i le LTA. E faafetai mo galuega uma e pei ona ta galulue mai ai, i taimi uma lava tatou te faatino ai nisi o galuega ma manaoga o le atunuu.

E faafetai foi i lau Afioga mo le avanoa, faafetai foi i le mamalu o le Palemene, le tapuaiga a Samoa, faafetai tele. Soifua ma ia manuia.

**FOFOGA FETALAI:** Ia malo saunoa i lau Afioga i le Minisita o Galuega. Se i tulai mai lau Afioga i le Palemia.

**Afioga Hon Fiame Naomi Mataafa:** Lau Afioga i le Fofoga Fetalai, ona e le i tali mai le Minisita i lau fesili, ae e taua le mea lea e saunoa mai ai le sui usufono. O lea la ou te malamalama, o le auga, o le i ai o se tupe e fai ai le maintenance, a o lea la e le o silasila i le isi itu, i le mafuaaga na taofi ai le tupe lea. Ia, o sou lava mafaufau, e ala ona taofi le tupe lea, se i siaki, po o le a le lelei o le faatinoga o le galuega lea, ia atoa le tausaga o la lava e lelei, e pei o le uiga lena.

O lau la tuualalo i le Afioga i le Minisita, i te i ua faaaoga le fautuaga a le sui, ae vaai lelei ia tatou konekarate ia e fai. O le a ave uma la tupe, ae oo i le isi masina leaga le auala, ae toe fai mai e sue le isi 10% e toe fai ai le maintenance o le mea ua leaga. O le mea lea e taua le tatou fetufaai faapea.

Ai o le talanoa a le afioga i le sui usufono mamalu, ona o le tagata fai konekarate. Ae talanoa atu matou, o tagata e ona galuega, o lea e manaomia ia matua lelei lava le faatinoina o le galuega. Ae o le maintenance ia, e sao oe, e le lava tupe i soo se maintenance auala, vaa, fale. O isi faiga faavae na e tataua ona silasila totoa i ai ia tatou. E fiafia e o fau mea, ae le fiafia e tausi mea.

Lau Afioga, faafetai.

**FOFOGA FETALAI:** Ou te iloa o lea ua manino le faamalamalama a le Palemia.

**Afioga Peseta Vaifou Tevagaena:** E leaga o lea ua fesili le afioga i le Palemia, leaga o au lea na avatua le mataupu. Lau Afioga i le Palemia, leaga e taua le mea lea e aumai e le Palemia. Ae o se tulaga taua foi lea na ou avatua, aua o le taimi leni, o lea e tipi le 10% a le konekarate. A uma le 12 masina, toe faafoi lea o le tupe lea a le konekarate. Pe 1 le vaiaso, 2 vaiaso ae toe afaina galuega ia, o lea la ua sau sao lava le fesili a le Palemia, o ai e faatupea? E faatupe e le Malo. A o le fesoasoani lea na tuu atu fai le pasene, 10% a le Malo, maintenance fund, o le tupe lea e taua o le maintenance fund a le Malo. Ae le toe aafia lava se 10% a konekarate, ave mama lava le tupe a le konekarate. O le 10% lea e faaoga e le Malo, e maintain ai ni auala e faaletonu aemaise lava le taimi leni i le suiga o le tau. So e le o i ai se tupe o lusi a le Malo, a o lea e gain le Malo. Se i toe avatu tasi lava le isi mataupu taua lea, e faalatele ai le finagalo o le tamaitai Palemia. O le taimi leni, e tai pei o le galuega a le World Bank lea na saunoa i ai le afioga i le Minisita, ma ADB ma galuega tetele ia e au i le \$400 miliona i le tausaga pe a faatino. E leai lava se tupe a le Malo o maua, leai ma se sene lava e tasi o maua. Ae a fai le 10% lea a le Malo, e maua le... a faapea e \$400 miliona, e maua le \$40 miliona maua fua a le Malo. A o le taimi leni, e leai ma se mea o maua a lo tatou Malo.

E pei o le agaga lea o lea e tau faamalamalama atu.

**FOFOGA FETALAI:** O lea ua manino, malo foi le fesoasoani mai lau Afioga i le sui usufono mo Faasaleleaga Nu 5. O lea ua maua lelei e le faafofogaaga a le Palemia ma le Kapeneta. Atonu e aoga foi fautuaga mo le agai i luma. Ae talitonu, malo lava le faasoa. O lea ua faafogafoga ma le totoa le paia o le Maota aemaise foi o le paia o le atunuu.

E momoli le agaga faafetai i lau afioga i le Minisita o Galuega, malo lava le silasila mamao, e talitonu foi e le faigofie lau Matagaluega, e talitonu foi e tele tele Matagaluega e i lalo o lau vaaiga, o le mea lea, faafetai i lau Afioga, malo le galulue. E faamalo foi i au Ofisa Sili o Pulega o Matagaluega, o lea lava e matauina tou te le o malolo lava o lo o faasolo pea a outou galuega.

E faafetai mo le tali malamalama i nisi o mataupu sa laga, i le paia o le Maota, ou te talitonu foi, o lea ua faamalieina uma o latou finagalo. O le mea lea, malo faafetai i lau Afioga i le Minisita o Galuega.

Ou te matau atu, ua le o toe mamao se taimi, e talitonu foi, o lo o fou mai le Minisita o Pisinisi ma Alamanuia ma Leipa, ou te talitonu o se taimi lelei foi lo tatou alausu a taeao i le soifua manuia, ia maua ai le malosi.

O lea ua tatou taunuu mai i le tatou malologa. Ua tatou taunuu i le faaiuga o le tatou galuega i lenei afiafi. O le agaga o le faafetai i le Atua ma Lana tausiga, ua tau manuia ai le alofaiva o le Maota, talu mai le taeao ua sola, seia oo mai lava i lenei afiafi. Ua tuneva le afiafi, ua tatau foi ona fai se malologa, tatou sailiili malosi. Ia taupuleola i le alofa o le Atua, e momoli atu lo outou soifua ma so tatou ola, i le aso a taeao, ona toe faaauau ai lea o le tatou galuega.

Ua malo le usufono i le tatou Maota nei, lau Afioga i le Taitai o le Malo lauAfioga i le Palemia, lau Afioga i le sui Palemia ma le Kapeneta, tainane foi Afioga i Minisita Lagolago, afio foi lau Afioga i le Sui Taitai ma le Itu Agai ma lena Itu o le Maota, faapea sui usufono uma o le Palemene. Malo le onosai, faafetai saunoa faamalo tapena.

Ou te faamalulu atu foi pe a fai ua i ai se aleu o le Fofoga Fetalai, e faamoemoe atu i lo outou finagalo faale-Atua.

Samoa i lau tapuaiga, e momoli atu le faafetai, afai ua i ai se upu ua sala a lau Palemene, matou te faamalulu atu.

E faafetai atu foi i le tapuaiga a Ofisa Sili o Pulega o Matagaluega, Faalapotopotoga Tumaoti a le Malo, malo i lo outou onosai.

Faafetai le tautua faaauau a le Matagaluega o Leoleo, Pulega o Tinei mu, Matagaluega o le Soifua Maloloina, ma le auaunaga faifaiepa a le 2AP, faafetai mo le tautuaina o le Palemene.

O toe upu a le Nofoa a tuuama le fua ma tatou tatala i lenei afiafi, ia tuliloaina lo outou afifio atu i le alofa o le Atua. Manuia le alo atu o le atunuu i faiga malologa o lenei afiafi.

Ae tatou te le i tolopo, e tapa le sui usufono mo Vaisigano Nu 1, e te tulai mai e saunia se tatou tatalo e faamaea ai le Fonotaga. Lau Afioga i le sui usufono mamalu o Vaisigano Nu 1.

*Na tolopo Taulumaga a le Fono Aoao Faitulafono i le itula e 10:00 i le po seia aulia le itula e 9:30 i le taeao o le Aso Lua, 01 Fepuari 2022.*